

मर्कूसए ओसरो

चाव था

आव पोस्तोको तोबो मर्कूस यादोज्यावए ओसरो ज़। नोलाई यूहन्ना ब यादोज्याव (ओसाचीर १२:१२; १५:३६-४१)। आलाव पाँ मत्ती सोनो लूकानी निसरो पाँकिन जाँ तूइँजा लिज्या। आल येसुए ओरासथैव पाँर कोसै मारै:र, जाँकोसै ओदोव येनर वाज़ रै:ज्या। कुधु पाला येसुए ओक्याँलाई 'डा मिँ मिन्सिद हुव' है उलिज्याव (मर्कूस २:१०; ८:३१)। नो 'मिँ मिन्सिउए' ओअर्थ येसु साचो मिँ ब उलिज्याव, परमेस्वरए साचो ओज़ा ब उलिज्याव। है जैद मानुवाताव मिँरालाई बाँचैद परमेस्वरए ल्योदा जैन्याए जूनी उजिउ भा:द यासेवा ओदोहुव ज़ रै:ज्या (१०:४५)।

रील सछैँज्याव यूहन्ना

(मत्ती ३:१-१२; लूका ३:१-१८;

यूहन्ना १:१६-२८)

१ आलाव सर्सिउ परमेस्वरए ओज़ा येसु ख्रीसए चाव ओथा ज़। २यसैया अगमबक्ताए धर्मसास्त्रल किताव ओसरो हिताव ज़ ताके। होए ओसरो आव ज़,

“डाकत्वाल्यालाई नड़ा नड़ा परीद डाईज्या।

नजूनी नोए नयेम

तयार जैदीरिज्याव।

३ नोए ओर्गा बनल अइ लिद

उकिज्याव थास्त्रिज्या,

‘हुरिज्याव प्रभुए ओयेम बनैद

गाँत्या गुंतीलाई सदाँचिके।’”

४ हिताव ज़ रील सछैँज्याव तोबो

१:२-३ मला ३:१; यसै ४०:३

यूहन्नाए बनल अइ लिद यासथैहुक्यो, “जेपापलाई रास्द जेयुँ परमेस्वरए ल्योदा फर्केद रील सछैँसिचिके। हो ताकिन ची जेपापर क्याल्सिद परमेस्वरस खैवर तान्या जेले।” ५नोए ओल्योक यहूदिया खन्दलावर सोनो यरूसलेम सहरलावर ओपो·स ज़ ओपाँ थैना याहुज़्याव। नोराए सु सु यादोव यापाप यूहन्नालाई है यादोक ते यूहन्नाए यर्दन भैल यासछैँक्यो।

६यूहन्नाए ऊँतए ओसनए क्वा ओक्वाइसिज़्याव, ओवाँ:त स्यालोए वाँ:फो ओपो·सिज़्याव। नोए स०ल०र कोस्योर ओराकैज़्याव, ज़ेराए राप उज़्युज़्याव। ७नोए अइ लिद यासथैक्यो, “डा डाछीनी डाकिन ओसक्ती ल्यो तोबो हुरिज़्या। डा होए ओपोलाए ओचें घोम लिद पला·न्या स्यासो ब डामाले। ८डा जेलाई रील डासछैँचिज़्या, होए परमेस्वरए छैँव उपुरूसनी सछैँचिरिज़्याव।”

येसु रील ओसछैँसिउ

(मत्ती ३:१३-१७; लूका ३:२१-२२;

यूहन्ना १:२६-३४)

९नो बेलाक येसु मनी गालील खन्दलाव नासरत सहरनी यूहन्नाए ल्योक हुके। नो ब यूहन्नानी यर्दन भैल

सछैँसिके। १०रीनी उपुलुसो प्राइँना ज़ नम फैसिद परमेस्वरए उपुरूस कुइतम मिताव भुहुँद ओक्याँत उचुसिज़्याव रँ:क्यो। ११हा:त ज़ नमतिन तोबो गा अइ लिद थास्के, “नँ डायुँलाव डाज़ा ज़। नँलाई रँ:द डायुँ होलाँ ताज़्या।”

सैतानए येसुलाई ओजाँचिउ

(मत्ती ४:१-११; लूका ४:१-१३)

१२येसु ननी पुलुस्द ओबाव प्राइँना ज़ परमेस्वरए छैँव उपुरूसए तोबो साइँसुइँव पोड लाँक्यो। १३नल चालीस दिन पै बनलाव स्यारास उलिज़्याक सैतानए येसुलाई जाँचिउ ज़ नैक्यो। ना:त ज़ स्वर्गताव परमेस्वरए ओचाकज्यार येसुए ल्योक हुद समारिकेर।

येसु चाव था सथैन्यात उथूसिउ

(मत्ती ४:१२-१७; लूका ४:१४-१५)

१४छीनी तछा रील सछैँज़्याव यूहन्ना क्यो:सिके। नोलाई याक्यो:व छ्यामकिन येसु गालील खन्दल हुद परमेस्वरए चाव ओथा अइ लिद यासथैक्यो, १५“बेला यो:के, परमेस्वरए ओराज्या सो हुरिके। परमेस्वरए ल्योदा जेयुँर फर्केद चाव थात जेयुँ सुहुचिके।”

येसुए चार जनालाई उसिसर ओराजैव

(मत्ती ४:१८-२२; लूका ५:१-११;

यूहन्ना १:३५-४२)

१६तछा येसु गालील दह छयो छयो ओबाज्याक सिमोन सोनो ओभाइ अन्द्रियासनी दहल जाल निरै:सिज्याव निरँ:क्यो। नोनी डाँ:र क्यो:ज्यावनी निल्यो। १७येसुए नोनिलाई, “डास हुचिन्के, जिनलाई डाँ:र जिन्रा-खिम्ज्याव मिताव मिँर खिम्न्या डाजैचिन्ज्या,” १८है उनिदोव प्राइँना ज़ नोनी निजालर ख्यानैद ओलस ज़ बाकिनी। १९जाँ होकसै याबावत फरी जब्दियाए ओज्जानी ओदाज्यु याकूब सोनो ओभाइ यूहन्नानी दोङ्गात चुसिद जालर निरातालिज्याव रँ:द, २०बेहार ज़ नोनिलाई ब निखुल्क्यो। नोनी निबाबु जब्दियालाई ओबाहोऽयारास दोङ्गात ख्यानैद येसुस बाकिनी।

येसुए माचाव पुरूसलाई ओपले-व

(लूका ४:३१-३७)

२१नकिन येसु चार जना ओरा-खुलोरास कफर्नहुम सहरल बाकेर। ओल येसुए न्नासिन्या छचाम ओतावत नलाव धर्मसास्त्र फ़िमल बाद परमेस्वरए ओपाँ यासथैक्यो। २२नलावर येसुए ओपाँ थैद अचम्ब

ताकेर, काराव ल्यो ताकिन होए सास्त्रीराए यारापैज्याव मिताव माताद बनै हकस ओरापैज्याव।

२३नो बेलाक धर्मसास्त्र फ़िमल माचाव पुरूसए क्यो:द ओनैज्याव तोबो मिँ ब उलिज्याव। नो बनै चिर चिर क्रिद, २४“अ नासरतलाव येसु, गेस नखै काता उलिज्याव? गेलाई खेम्ना नहुव रो? डा नँलाई डासरेस्निज्या, नँ परमेस्वरए छैव उमीं ज़,” है ओदोक ते, २५येसुए नोलाई हप्कैद, “भ्याउँ तालिनी, आवए ओक्याँतिन पुलुस्द बान्के,” है ओदोव प्राइँना ज़, २६नो माचाव पुरूसए नो मिँलाई कारापनी कुरूप जैद चिर चिर क्रिद पुलुस्द बाके। २७निताव रँ:द प्राइँ ज़ अचम्ब ताद या याल, “आव काता ओताव इताव? आवए ते सा:रो पाँर ना: हकस ची ओरापैज्याव ओल्यो। माचाव पुरूसरालाई ओराहप्कैक मनी ओपाँर यादोऽयाव ची ओल्यो,” है लिकेर। २८है जैद ‘येसुए निताव येनर दोक्यो दी’ लिन्या गालील खन्द भरिल प्राइँदा ज़ थास्नाके।

सिमोनए उमुइँज्युलाई येसुए ओसगराँव

(मत्ती ८:१४-१५; लूका ४:३८-३९)

२९धर्मसास्त्र फ़िमनी यापुलुसो प्राइँना ज़ येसु चार जना उसिसरास सिमोन

सोनो अन्द्रियासनी निक्किमक बाकेर।
३० नक सिमोनए उमुइँज्यु ओजोरो
हुद घ्याँसिद उलिङ्याव। उक्किमक
याबाव प्राइँना ज़ ‘ओजोरो हुङ्या’ लिद
येसुलाई है दोकेर। ३१ येसु नो ओजोरो
हुङ्यावए ल्योक बाद उकुइनी क्योःद
ओसोचोइव प्राइँना ज़ ओजोरोए
रास्क्यो। हाःत ज़ नोए येसु सोनो
उसिसरालाई ज़्यावर जैद याएक्यो।

येसुए कुधुलाई ओरासगराँव

(मत्ती ८:१६-१७; लूका ४:४०-४१)

३२ रिमदा रिमदा नम उनुपोत नलाव
मिँराए याजोरो हुवर सोनो माचाव
पुरूसराए क्योःद यारानैङ्यावरालाई
येसुए ओल्योक यारारैकेर। ३३ सहर-
लाव मिँ भरी यामक छुइसिद
यालिङ्याव। ३४ येसुए कुधु बेथाए
क्योःद ओरानैङ्यावरालाई ब
यासगराँक्यो, याक्याँत माचाव पुरूस
ल्योरालाई ब याक्याँतिन माचाव
पुरूसर पले-दचाद यासगराँक्यो। नो
पुरूसराए येसुलाई यासरेऽङ्यावए
येसुए पाँव ज़ ओमाराएङ्याव।

येसुए गालीलल परमेस्वरए ओपाँ ओरासथैव

(लूका ४:४२-४४)

३५ छकालन्या ओमासँद ज़ येसु
सोद भिमनी पुलुस्द साइँसुइँव पोक

बाद परमेस्वरलाई ओपोँखारिङ्याव।
३६ सिमोन सोनो ओलस लिङ्यावराए
‘काना ओबाव’ लिद खिमनाकेर।
३७ यादैक, “नँलाई प्राइँए ज़ खिम-
निङ्यार,” है यादोक ते, ३८ येसुए,
“परमेस्वरए ओपाँ आजीलावरालाई
वाज़ डारासथैहुव माःक, हुजीदाडाव-
राए जूँनी पाला ज़। हुचिके, नदा ब
गेरासथैना,” है यादोक्यो। ३९ है जैद
ननी बाद गालील खन्द भरिलाव
यहूदीराए धर्मसास्त्र भिम भिमक
बाद परमेस्वरए ओपाँ प्राइँलाई ज़
यासथैक्यो। याक्याँत माचाव पुरूस
ल्योरालाई ब माचाव पुरूसर पले-द
याएक्यो।

येसुए कुरीलाई ओसगराँव

(मत्ती ८:१-४; लूका ५:१२-१६)

४० हो बेलाक ज़ तोबो कुरी येसुए
ल्योक हुद उखँत फुलुप्सिद, “अ
प्रभु, डाल्योदा नयुँ ओताकिन
डालाई सगराँन्या नले,” है ओदोक
ते, ४१ येसुए उयुँ नाद नोलाई उकुइए
छापद, “नल्योदा डायुँ लिङ्या ज़,
गराँनिके,” ४२ है ओदोव प्राइँना
ज़, नो ओक्याँताव कुरीए रास्द
सोजोकाव ज़ ताके। ४३ येसुए नो
गराँवलाई अइ लिद अरैद बेहार
ज़ परीक्यो, ४४ “आव नक्याँताव
डादोव येन सुलाई ज़ है तारादोयो।

बुरू नगराँव साचो ज़ ओल्यो लिन्या थःरैव परींन्याए जूनी पुजारीए ल्योक सतैसिनाद मोसाए ओकानुन-लाव मिताव चरैःन्यार चरैःनाके।”
 ४५खाली नो गराँवए भन ननी पुलुस्द ओक्याँत ताव भरी प्राइँदा ज़ फींजैक्यो। है जैद येसुए उमिन बनै ओथासोए नजीलाव सहर नाखार जीदा बाव मादैद साइँसुइँवक लिनाके। हितावत ब मिँर प्राइँनी ज़ ओल्योक दैसिहूकेर।

येसुए उखँ उकुइ सिउलाई ओसगराँव

(मत्ती ६:१-८; लूका ५:१७-२६)

२ तछा छीनी येसु कफर्नहुम सहरल उहुवत, ‘येसु उलिज़्याव फ़िमक हुके दी’ लिन्या थास्के।
 २ओल्योक मिँर बनै सुइँः मासुइँः छुइसिहुद फ़िम भरी, मैरा भरी ब मासुइँःकेर। येसुए नोरालाई परमेस्वरए ओपाँ ओरासथैज़्याव। ३नो बेलाक ज़ तोबो उखँ उकुइ सिउलाई चार जनाए घुर्द यारैज़्याव। ४खाली येसुए ल्योक मिँर बनै माहोल्या यातावए ओल्योक बान्या येम मादैद नोर थालात बाद फ़िम कप्सिउ फ़ल्यार जाँवा हाइद सघ्वाँःद नो उखँ उकुइ सिउलाई

ओभेलोङ्गारास येसुए ओड़ाक भरैदिकेर। ५येसुए नोराए यायुँ उहुबो रँःद नो उखँ उकुइ सिउलाई, “अ कान्छा, नपाप क्याल्सिके,” है दोक्यो।

६नो है ओदोव नक लिज़्याव सास्त्रीराए थैद यायुँल यायुँल, ७“आव मिँ काराव ब्याँ इताव ओपाँज़्याव, परमेस्वरए उमिन ओबलेःज़्याव। मिँए ओपाप क्याल्न्या परमेस्वरकिन सु ची उलिज़्यावदा?” है लिकेर। ८हाःत ज़ येसुए नोराए यायुँलाव पाँ सैद, “जे काराव जेयुँल नै जेलिज़्याव? ९नो घ्याँस्यालाई, ‘नपाप क्याल्सिके’ है दान्या सैँ ‘सोद नभेलोङ्गार घुर्द बान्के’ है दान्या काताकाव सजालो उलिज़्याव? १०अब डा मिँ मिन्सिद हुवए आव मानुवात पाप क्याल्न्या डाकुइत उलिज़्याव सैँ ओमालिज़्याव, चिऊचिके,” है दाद नो उखँ उकुइ सिउलाई, ११“डा नँलाई है डादींज़्या, नँ सोद नभेलोङ्गार घुर्द नफ़िमदा बान्के,” है ओदोक ते, १२नो उखँ उकुइ सिउ थर च्याँःसिद ओभेलोङ्गार घुर्द याड़ाकिन पुलुस्द बाके। मिताव रँःद प्राइँ ज़ अचम्ब ताद, “इताव ते खर्क ज़ गेमारँःए,” लिद परमेस्वरए उमिन सघ्योःदिकेर।

येसुए लेबीलाई उसिस ओजैव

(मत्ती ९:९-१३; लूका ५:२७-३२)

१३नकिन येसु फरी दह छचोक बाके। ओल्योक मिँर बनै माहोल्या याहुज्याव। नोरालाई परमेस्वरए ओपाँ यासथैक्यो। १४ननी पुलुस्द ओबाज्याक तोबो अल्फयसए ओजा लेबीलाई सिर्मा स्योःन्या अद्दाक चुसिद उलिज्याव रँ:द नोलाई, “डास हुन्के,” है ओदोव प्राइँना ज़ नो च्याँ:सिद येसुए उछींत बाके।

१५नकिन जाँवाक येसु उसिसरास लेबीए उक्किमक बाद ज़्यान्याए जूँनी चुसिकेर। नो बेलाक यास सिप ज़्युज्यावर सिर्मा स्योःज्यावर स्रो नो पापी है यारादोज्यावर बनै कुधु ज़ यालिज्याव। निताव मिँर येसुस बारिज्यावर कुधु ज़ यालिज्याव। १६नितावरास येसुए सिप उज्युज्याव फरिसीरासकाव सास्त्रीराए रँ:द येसुए उसिसरालाई, “जेगुर्बा काराव निताव सिर्मा स्योःज्यावर स्रो नो पापीरास सिप उज्युज्याव?” है यारादोज्याव १७येसुए थैद, “याजोरो माहुज्यावरालाई सगराँन्या मिँ माचाहिए, याजोरो हुज्यावरालाई वाज़ चाहिज्या। हिताव ज़ डा मनी ‘गे धर्मी’ है लिज्यावराए जूँनी डाहुव मा:क, ‘गे पापीर ज़’ है लिज्यावराए जूँनी डाहुव ची।”

उपासिन्या

(मत्ती ९:१४-१७; लूका ५:३३-३६)

१८ख्वा मिँर रील सछैँज्याव यूहन्नाए उसिसर स्रो नो फरिसीरासकाव याउपासिज्याव रँ:द येसुए ल्योक हुद, “यूहन्नाए उसिसर स्रो नो फरिसीर ते उपासिज्यार, नँ नसिसर काराव यामाउपासिज्याव?” है यादोक ते, १९येसुए नोरालाई, “जन्तीर ब्याहोल्यास यालेवा पै याउपासिज्याव रो? ब्याहोल्या यास ओलेवा पै माउपासिर। २०खाली जो छचामकिन ब्याहोल्यालाई छुतैर, हो छचामकिन वाज़ उपासिन्या लेर,” है दाद, २१फरी, “सुए ज़ ओरे छिबो क्वालाई सा:रो क्वाए मातालिउ। ओतालिकिन नो सा:रोए पुराँदोलाई ओल्योदा सेल्द भन ज़ चीज्याव। २२स्रो नो, सा:रो दाखमदच पुराँदो पिर्गुलल सुए ज़ माभा:र। मानी उस०ए पिर्गुललाई सुफुद दाखमदच ब भोन्या ले, पिर्गुल ब खेर ज़ बान्या ले। है जैद सा:रो दाखमदच सा:रो पिर्गुलल वाज़ भा:र।”

येसु नासिन्या छचामकिन घेप्पा

(मत्ती १२:१-८; लूका ६:१-५)

२३हो बेलाक तछा नासिन्या छचाम येसु उसिसरास एँ: खालाव घ्याँ

याबाज़्याक उसिसराए बाला फ्यान्द याकैज़्याव। २४ फरिसीराए येसुलाई, “चिऊके, नसिसराए न्नासिन्या छचाम मादान्या येन काराव यादोज़्याव?” है यादोक ते, २५ येसुए, “धर्मसास्त्रलाव सर्सिउ दाऊद राजा ओनैरास याकरेकाव यादोव येन जेमापरिए रो? २६ दाऊद प्रधान पुजारी अबियाथारए ओपालाक ध्यान फ़िमल पसिद परमेस्वरलाई चरै:सिउ भरेस हाइद ओल मनी ज़्युक्यो, ओनैरालाई मनी याएक्यो। नो भरेस पुजारीराए वाज़ ज़्यान्या ओताज़्याव। २७ जे आव ब सैंच्यो, मिँर न्नासिन्या छचामए जूनी जैसिउ मा:क, न्नासिन्या छचाम मिँराए जूनी ज़ जैसिउ ची। २८ है जैद डा मिँ मिन्सिद हुव न्नासिन्या छचामकिन ब घेप्पा ज़ डालिज़्या,” है यादोक्यो।

येसुए उकुइ थँवलाई ओसगराँव

(मत्ती १२:६-१४; लूका ६:६-११)

३ फरी तछा येसु धर्मसास्त्र फ़िमल बाके। नल उकुइ थँव मिँ तोबो उलिज़्याव। ३ नल लिज़्यावराए येसुए ओपाहा भा:दचान्याए जूनी न्नासिन्या छचाम नो उकुइ थँवलाई मासगराँज़्याव ब्याँ लिद चिऊद यानैज़्याव। ३ ना:त ज़ येसुए नो उकुइ

थँवलाई, “आक हुद च्याँ:सिन्के,” है दाद, ४ नोरालाई, “न्नासिन्या छचामकाव येन चाव जैन्या सैं माचाव जैन्या? मिँलाई बाँचैन्या सैं बलेन्या? कानुनए कै उलिज़्याव?” है ओरादोक ते, सुए ज़ घाइ मालिकेर। ५ येसुए, काता ना: यारुँ खावर यालिज़्याव लिद उरुँ माचाव दाद उरिसए प्राइँलाई तछचोनी चिऊद नो उकुइ थँवलाई, “नकुइ तङ्गैके,” है ओदोक ते, उकुइ ओतङ्गैव प्राइँना सोजोकाव ज़ ताके। ६ नो फरिसीराए निताव रँ:द लाँ:दा पुलुस्द, ‘आवलाई कै जैद सै:न्या ओताव?’ लिद बेहार ज़ हेरोद राजासकावरास गुमुस्ता दोनाकेर।

येसुए ल्योक हुज़्याव माहोल्थार

७ येसु उसिसरास ननी हाइसिद गालील दह जीदा बाकेर। नल कुधु मिँर गालील सोनो यहूदिया खन्दनी उछींत याहुज़्याव। ८ येसुए ओयेनर थैद ख्वार यरूसलेम सहरनी, ख्वार इदुमिआ खन्दनी, ख्वार यर्दन भै होफतिन, ख्वार तुरोस सोनो सीदोन जीनी ब याहुज़्याव। ९ है जैद मिँर बनै काला मुलु ताद ओललाई बनै छिला छिला याजैवए उसिसरालाई दोङ्गा तोबो रैव यापरीक्यो। १० मिँर बनै

कुधु ओरासगराँवए याजोरो हुज्याव भरिए येसुलाई छाप्न्याए जूनी बनै याछुइसिहुज्याव। ११जोक ब माचाव पुरूसराए येसुलाई यारँ:व प्राइँना होक ज़ ओड़ाक फुलुप्सिद, “नँ परमेस्वरए ओज़ा ज़,” है लिद याक्किज्याव। १२खाली येसुए नोरालाई, “डा परमेस्वरए ओज़ा ज़ लिन्या सुलाई ज़ है तारादोच्यो,” है ओरादोज्याव।

येसुए बाह जना ओसाचीर

(मत्ती १०:१-४; लूका ६:१२-१६)

१३नकिन येसु तोबो दाँदात पुलुस्द उयुँलाव मिताव मिँ भरिलाई ओराखुल्क नोर ओल्योक हुकेर। १४नो भरिरानी बाह जना ओलस लिन्या ओसाचीर जैद नोरालाई चाव था सथैन्या, १५सोनो माचाव पुरूसर पले-न्या हक ब याएक्यो। १६नो बाह जनाराए यामिनर आवर ज़ — सिमोन (छींनी होए उमिन पत्रुस जैदिक्यो), १७जब्दियाए ओज़ानी याकूब सोनो यूहन्नानी (छींनी नोनी निपाँ:च्या ‘बोअनर्गेस’ नैद निएक्यो। नोए ओअर्थ ‘गर्जिज्यावनी’।) १८नकिन अन्द्रियास, फिलिप, बारथोलोमाइ, मत्ती, थोमा, अल्फयसए ओज़ा याकूब, थेदियस, देसभक्ता सिमोन, १९सोनो छींनी येसुलाई धोका याज्याव यहूदा इस्करियोत।

येसुलाई सैताननिकाव याजैव


(मत्ती १२:२२-३२; लूका ११:१४-२३;

१२:१०)

२०येसु फरी उक्किमक उहुक मिँ बने काला मुलु याहुज्यावए उसिसरास ज्यावर ब ज्युव मादैकेर। २१ख्वाराए येसुलाई ‘दासानी बिसा ताज्या’ है ब यादोज्याव। ओक्याँदाडावराए फरी निताव पाँर थैद येसुलाई चिहुकेर। २२यरूसलेमनी हुव सास्त्रीराए मनी, “आवए ओक्याँत ते माचाव पुरूसराए याघेप्पा बालजिबुल चरिद ले। होए उमिननी ज़ माचाव पुरूसरालाई ओरापले-ज्याव ची,” है लिकेर।

२३येसुए नोरालाई ओल्योदा खुल्द अइ लिद घर्ती भा:द याएक्यो, “सैतानए ओल सैतानलाई कै जैद ओपले-ज्याव? २४तोबो राज्यालाव मिँर या या यामाखैकिन नो राज्या माथेरिए। २५हो मिताव ज़ तोबो फिमलावर या या यामाखैकिन चितराँ पुतराँ तान्या लेर। २६है जैद सैतानए ओराज्यालावर ब या या माखैद तँदा तँदा याजैसिकिन नोर मनी माथेरिद यामिन ज़ मान्या ले। २७फरी तोबो ओसा ल्यो मिँलाई डादा यामाकिवा पै उक्किम पा-द ओजा-यार हाइद मालाँधुर।

२८“डा जेलाई साचो है डादाचिज्या, मिँराए जो पाप यादोदी ब, परमेस्वरए



(४:१)

उमिन याबले-दी ब नोराए यापाप क्यालो दैसिए। २६खाली जोए परमेस्वरए छैव उपुरुसए उमिन बले-दिज्याव, होए ओपाप क्यालो मादैसिए। नितावए ओपाप खर्क ज़ माखेमे,” है लिद यासथैक्यो। ३०नो सास्त्रीराए ‘येसुए ओक्याँत माचाव पुरुस चरिद ले’ है यादोज्यावए येसुए आव पाँ ओरासथैव।

येसुए ओआमार ओभाइर

(मत्ती १२:४६-५०; लूका ८:१९-२१)

३१हा:त ज़ येसुए ओआमा स़ोनो ओभाइर हुद लाँ:क च्याँ:सिद येसु-लाई क़िउ यारापरीकेर। ३२फ़िमल येसुए ओलापक मिँर माहोल्या चुसिद यालिज्याव। है जैद नो क़िउ यारापरीवराए, “लाँ:क नआमा स़ोनो नभाइर नँस दैसिना हुद लेर,” है यादोक ते, ३३येसुए, “डाआमार डाभाइर

कितावर?” है लिद, ३४ओलापक चुसिद लिज्यावराए ल्योदा भाल्सिद, “चिऊचिके, डाआमार डाभाइर आवर ज़। ३५जोराए परमेस्वरए ओपाँ थैद दोज्यार, होर ज़ डाआमार डाभाइर बैनीर,” है लिके।

धुर वास्न्या घर्ती

(मत्ती १३:१-९; लूका ८:४-८)

४ फरी तछा येसु दह छचोक चुसिद परमेस्वरए ओपाँ ओरा-सथैज्याव। ओल्योक मिँर बनै ल्यो माल्यो यातावए येसु दोङ्गाल चुसिद दोङ्गालाई रील जाँ होकसै लाँक्यो। माहोल्या भरी ओङ्गक दह छचोक चुसिकेर। २याचुसिउत येसुए नोरालाई ओपाँ घर्ती फ़ा:द यासथैक्यो। तोबो ओरासथैव आव ज़, ३“थैचिके, तोबो मिँ ओएँ:ल धुर वास्ना बाके दी। ४धुर ओवास्न्याक रूवा येम

जीदा परिके दी। नो येमलाव परिउ बाज़ाराए ज्युकेर दी। ५रूवा धुर गम छ्या छ्या ल्यो ओदादरत परिके दी। नत गम छ्या छ्या वाज़ ल्यो ओतावए हतप्त ज़ परीके दी। ६खाली निमी ओसोराक उहुवत ओजरा नाम जील ओमाल्योए च्याकराप चिकुरूप थँके दी। ७फरी रूवा धुर जुर रमराए खाल परिके दी। नोलाई जुर रमराए गाल्द ओसै माल्यो दाँथ्या ताके दी। ८फरी रूवा धुर ते चाव गमस्याल परिके दी। नो बनै चावस परीद भेंःद ओसै बनै भ्नाःद रूवात तीस, रूवात साथी, रूवात सय दोबोर यासै भ्नाःकेर दी। ९आव पाँ जोए थैन्या उयुँ लिज़्या, चावस ओथैवक,” है लिद यासथैक्यो।

थैज़्यावत ब मातीधुर

(मत्ती १३:१०-१७; लूका ८:९-१०)

१०नो माहोल्यार याबाव छीनी बाह्व जना उसिसर सोनो ओलस बारिज़्यावराए, “नो नभ्नाःव घर्तीए ओअर्थ काता?” है यादोक ते, ११येसुए, “जेलाई वाज़ परमेस्वरए ओराज्यालाव कप्सिउ पाँर छर्लङ्ग सतैसिउ लिज़्या, उपुर्कावरालाई ते घर्ती मिताव ज़ लिज़्या। १२है जैद ज़,

‘नोराए रँःन्या ते रँःज़्यार,
मासरेस्धुर।
थैन्या ते थैज़्यार, मातीधुर।
नितावर यामाताव ताकिन
परमेस्वरए ल्योदा यायुँ फर्केद
यापाप ब क्याल्सिखेहो।’ ”

धुर वास्सिउ घर्तीए ओअर्थ

(मत्ती १३:१८-२३; लूका ८:११-१५)

१३नकिन येसुए नोरालाई है यादोक्यो, “काता जे मनी नो डाभ्नाःव घर्तीए ओअर्थ जेमासैए रो? छुत भन कै जैद जेतीधुके? १४धुर वास्ज़्याव, परमेस्वरए ओपाँ सथैज़्याव मिँ ज़। १५नो येमलाव परिउ भरी जोए परमेस्वरए ओपाँ ओथैव प्राइँना सैतान हुद उयुँलाव वास्सिउ पाँ भरी स्याप सिप जैद लाँदिज़्याव। १६हो मिताव ज़ नो ओदादरताव परिउ भरी जोए परमेस्वरए ओपाँ थैद बेहार ज़ तीद खुसी ब ताज़्या। १७खाली नो मिँ परमेस्वरए ओपाँत उयुँल ओजरा माल्यो मिताव ओतावए नो पाँ छ्यावा पै वाज़ रहिज़्या। नो पाँनी नोए ओक्याँत खिरीर उपसिकिन दुखर ओदैकिन नो पाँत उयुँ क्य़ाज़्या। १८नो जुर रमराए खालाव परिउ भरी आव ज़, नोराए परमेस्वरए ओपाँ ते थैज़्यार,

१६खाली धन सम्पतीदा यायुं थू जैद 'आव गेजित्त कै तान्या ओताव, कातानी थॉतस लिन्या' लिद व्रीनी फुइ ब लिज़्यार। है जैद नितावराए परमेस्वरए ओपाँलाई यागालोए नो पाँ ओसै भाःज़्याव ताज़्या। २०नो चाव गमस्याल परिउ भरी आव ज़, जोए परमेस्वरए ओपाँ थैद चावस रैद ओसै भाःज़्याव धुर स्यासो र्खावत तीस, र्खावत साथी, र्खावत सय दोबोर भाःज़्याव।”

दिउ बाल्न्यात तैःसिउ लोसै

(लूका ८:१६-१८)

२१येसुए फरी तोबो घर्ती अइ लिद भाःक्यो, “सुए ज़ लोसै तैःद जाए माकबो, खात खँल माम्नोव। दिउ बाल्न्यात ची भाःव। २२हिताव ज़ मारैःव भरी तछा रैःन्या ज़ ले, कप्सिउ भरी ब पलाँवल तान्या ले। २३आव पाँत जोए थैन्या उयुं लिज़्या, ओर्ना घ्याँ जैद ओथैवक।”

२४फरी नोरालाई, “जेथैज़्याव भरी बनै धिद थैच्यो। किताव गोइँनी जेगोइँज़्या, जे मनी हिताव गोइँनी ज़ दैन्या जेले, भन कुधु ब दैन्या जेले। २५है जैद जोए धिद थैज़्याव, होए भन ज़ तीधुन्या ले। जोए चावस माथैव,

होए भन ज़ थैन्या युं मादाद डादाडाव ओथैव ब ओपोःस ज़ मान्या ले।”

परमेस्वरए ओराज्या परीज़्याव धुर मिताव ज़

२६फरी, “परमेस्वरए ओराज्या तोबो मिँए ओएँःल धुर ओवासो मिताव लिज़्या। २७नोए धुर ओवासोत स्याँन्या बेलाक स्याँज़्या, सोन्या बेलाक सोज़्या। उपुर काता येन ज़ ओमादोदी ब नो धुर ओलनी ज़ परीद भेंःज़्या। कै जैद ओताज़्याव ओल ब मासैव। २८गमए ओल ज़ नो धुरलाई सपरीज़्याव। है जैद नो धुर डादा तआखला नेआखला ताद भेंःद सेःज़्या, नकिन ओबाला ब भाःज़्याव। २९ओसै उमीःवत नो वासोए ओराँकासीस हुद ओएँःलाव अन भरी एन्ज्याव।”

बाजीए उधुर

(मत्ती १३:३१-३२; लूका १३:१८-१९)

३०येसु फरी, “परमेस्वरए ओराज्या किताव उलिज़्याव, किताव अर्थनी पलास्द डायचिके लिक ते, ३१परमेस्वरए ओराज्या तोबो बाजीए उधुर स्यासो लिज़्या। नो धुर प्राइँरानी तकेज़ा ओतादी ब बारील रूपिक,

३२ परीद ओघ्योःवत नो बारीलाव ड़ैराकिन प्राइँरानी घेप्पा ताद ओखारर ब भाःज्याव।[†] नत नमताव भुज्याव बाज़ार ओछैँयाल सिपर जैद बासिज्यार।”

३३ मिँराए परमेस्वरए ओपाँ घती-धुरक लिद येसुए इताव कुधु घर्तीर भाःद ओराएज्याव। ३४ घर्ती ओमाभाःवा पै ओमारासथैँज्याव। याबातड याताक उसिसरालाई वाज़ ओअर्थ भरी पलास्द ओराएज्याव।

येसुए बतासलाई ओथकनैव

(मत्ती ८:२३-२७; लूका ८:२२-२५)

३५ हो छयाम रिमक येसुए उसिसरालाई, “दह होफत गेबाया,” है ओरादोक ते, ३६ उसिसर नो माहोल्यारास भाःसिद येसु चुसिद उलिज्याव दोङ्गाल पसिद बाकेर। यास बाज्यावर छुत दोङ्गार ब यालिज्याव। ३७ याबाज्याक उमँःजानी घ्योःव हुरी बतास हुद रीए ओछल्कार दोङ्गाल पसिद नोलाई गदैवा गदैवा जैक्यो। ३८ हो बेलाक येसु दोङ्गाए ओर्मैःत गुम जैद ड़ल्द उलिज्याव। उसिसराए येसुलाई सोचोइद, “गुर्बा, खदम ज़ गेतारिके, काराव घाइ नमालिज्याव?” है यादोक ते, ३९ येसु सोद बतासलाई

सिडार्द रीलाई ब “चिम दोके,” है ओदोव प्राइँना ज़ बतास ब थकनिके, री ब अदिके। ४० हाःत ज़ येसुए, “जे काराव जेछेःज्याव, कै जैद जेयुँ ओमाहुज्याव?” है ओरादोक ते, ४१ नोर बनै छेःद या याल, “आव किताव मिँ ओताव? बतासर रीराए ब ओपाँ यादोज्याव,” है लिकेर।

खादर पोल लिज्याव बूलिउ मिँ

(मत्ती ८:२८-३४; लूका ८:२६-३६)

५ येसु उसिसरास दह होफताव गेरासेनस यादोज्याव पोड केस्द, २ येसु दोङ्गातिन उभरिउ प्राइँना ज़ माचाव पुरूसए क्योःद ओनैज्याव तोबो मिँ खादर पोनी पुलुस्द येसुए ल्योक दैसिहुके। ३ नो मिँ एकतार खादर जीदा ज़ उलिज्याव। नोलाई सुए ज़ साँगलए ब यामाकिधुज्याव। ४ कुधु पाला साँगलए किद, हलाल याभाःदी ब, साँगलर पाता पत० ओराफ्याःज्याव, हलार ब कुतु कुतु केःद ओराख्याज्याव। है जैद सुए ज़ यामाहारैधुज्याव। ५ नो लाकनी रील खादर जीदा, हाँ जीदा चिर चिर क्रिद लुँ लुँराए उरूमसिज्याव।

६ नोए येसुलाई तादानी उरँःव प्राइँना ओल्योक धोंःहुद उखँत फुलुप्सिद,

[†]४:३२ इस्राएल देसलाव बाजी ड़ै नेमितर सोमितर दँ भेःव ओताज्याव।



७बनै चोइस, “अ येसु, माहान परमेस्वरए ओज़ा, डास नखै काता उलिज़्याव? परमेस्वरए उमिननी है डादीज़्या, डालाई दुख तायाँ,” है दोक्यो। ८नो माचाव पुरूसलाई येसुए डादा ज़, “ए माचाव पुरूस, आव मिँए ओक्याँतिन पुलुस्द बान्के,” है दाद ओनैज़्याव। ९येसुए फरी, “नमिन कै?” है ओदोक ते, “डामिन फौजी, गे कुधु ज़ गेलिज़्या,” है दोक्यो। १०नोराए, “गेलाई आव पोनी तापले-सियो,” है लिद बिन्ती दोकेर।

११नो बेलाक ज़ नक तोबो दाँदात ऊर तबगाल यालाज़्याव। १२नो माचाव पुरूसराए, “गेलाई बुरू नो ऊराए क्याँत बाव यासिके,” लिद बिन्ती यादोक ते, १३येसुए भैःद याएक्यो। है जैद नो माचाव पुरूसर नो मिँए ओक्याँतिन पुलुस्द ऊराए क्याँत बाकेर। हो प्राइँना ज़ ऊ भरी बूलिद दाँदातिन सुइँःकिनाद दहल ज़ो-द प्राइँ ज़ सुद सिकेर। नो ऊर नेहजाराकाव बगाल याल्यो।

१४निताव रँःद नो ऊ गावलार धोंःनाद सहर जीदा, नाखार जीदा बाद नो यारँःव भरी है यारादोकेर। नो पाँ थैव भरी कै ओताव लिद चिऊना हुवर, १५येसुए ल्योक याबाक नो माचाव पुरूसराए यारासो मिँ ओक्वार क्वाइसिद सोजोकाव ज़

चुसिद उलिज़्याव रँःकेर। निताव रँःद नोर छे-केर। १६नो चिऊना हुवरालाई, नो येन रँःव भरिए, “बूलिउलाई इताव इताव ताके, ऊरालाई इताव इताव ताके,” लिद है यारादोकेर। १७है जैद नो गेरासेनस खन्दलाव मिँराए येसुलाई, “आनी पुलुस्द बान्के,” है लिद बिन्ती दोकेर।

१८येसु दोङ्गाल उपसिज़्याक नो माचाव पुरूसराए यारासो मिँए, “डालाई ब नँस लाँनाके,” है लिद बिन्ती ओदोक ते, १९येसुए भैःद मायाद, “बुरू नँ नक्किमदा बाद ननै नमेंरालाई, ‘परमेस्वरए डालाई उयुँ नाद डाजूनी आःल्दिउ येन दादचाँक्यो,’ है लिद यासथैनाके,” है दोक्यो। २०है जैद नो मिँ देकापोलिस खन्दल बाद ओल उजूनी येसुए ओदोव येन यासथैक्यो। थैज़्याव भरी अचम्ब ताकेर।

याइरसए ओज़ा सिउ ओपैज़्याव

(मत्ती ९:१८-१९; लूका ८:४०-४२)

२१येसु दोङ्गाल ओल्द दह आफत उहुत मिँर बनै माहोल्या दुप्सिहुकेर। ओल दह छचोक ज़ उलिज़्याव। २२नाःत ज़ धर्मसास्त्र फ़िमलाव तोबो याघेप्पा याइरस यादोज़्याव नक हुद येसुलाई रँःद उखँत फ़ुलुप्सिद, २३“ज़िम्ज़ा मेंमा डाज़ा सिउ पैज़्याव।



नँ हुद नोए ओक्याँत नकुइ नैद नएकिन नो गराँद बाँचिन्या ले,” लिद बिन्ती ओदोक ते, २४येसु नोस ज़ बाके।

भी भोन्या ओबेथा ल्यो मेंमा

(मत्ती ६:२०-२२; लूका ८:४३-४८)

मिँर बनै माहोल्या येसुए उछीं उछीं येमत बनै याछुइसिनाज़्याव। २५नो माहोल्याराए याखार्ल तोबो बाह् बर्स भरी ओक्याँतिन भी भोन्या बेथाए क्योःद ओनैज़्याव मेंमा ब उलिज़्याव। २६नो मेंमा सगराँसिन्याए जूनी वासः जैज़्याव कुधुराए ल्योक ओलसकाव लिज़्याव भरी ओपोःस ज़ खेम्द ब जात ज़ मागराँके, भन ज़ हया गती तानाद उलिज़्याव। २७है जैद नोए येसुए ओदोव येन भरी थैद माहोल्याराए खार्ल पसिद येसुए उछींनी हुद ओक्वात छाप्दिक्वो। २८नो मेंमाए उयुँल उयुँल, “येसुए ओक्वा वाज़ छापो डादैकिन आव बेथानी गराँन्या डाले,” है उलिज़्याव। २९ओछापो प्राइँना नो भी भोन्या बेथा ब गराँके, ओगराँव ओक्याँत ब दारिँके।

३०हाःत ज़ येसुए ओक्याँतिन सगराँन्या सक्ती पुलुस्द ओबाव दारिँद नो माहोल्याराए खार्ल उछींदा फर्किद, “डाक्वात सुए ओछापो?” है ओरादोक ते, ३१उसिसराए,

“आः याछुइसिज़्यावल कै जैद ‘सुए ओछापनाव,’ है नलिज़्याव?” है यादोक ते, ३२येसुए भन ‘सुए ओछापनाव?’ है लिद आदा होदा याचिऊक्वो। ३३नो मेंमा ‘डागराँके’ लिन्या सैद ओछ्याचेए गूए गूए येसुए उखँत फुलुप्सिद ओक्याँत ताव पाँ भरी ओपोःस ज़ है दोक्वो। ३४येसुए नोलाई, “अ माँ, डालाई नयुँ नसुहुबोनी ज़ नगराँके। चावस बानी। नबेथाए रास्निक्वो,” है दोक्वो।

येसुए याइरसए ओज़ालाई सिउनी ओसोचोइव

(मत्ती ६:२३-२६; लूका ८:४६-५६)

३५येसु नो मेंमास ओपाँज़्याक ज़ धर्मसास्त्र फ़िमलाव याघेप्पा याइरसए उफ़िमनिकावर हुद याइरसलाई, “गुर्बालाई काराव हत्या यान्या, नज़ा सिधुके,” है दोकेर। ३६नोराए यापाँ येसुए माथैव जैसिद याइरसलाई, “नयुँ तासतेयो, नयुँ वाज़ उहुप्क,” है दाद, ३७छुतरालाई ओलस बाव मायाद पत्रुस, याकूब सोनो याकूबए ओभाइ यूहन्नारालाई वाज़ यालाँक्वो। ३८नो धर्मसास्त्र फ़िमलाव याघेप्पाए उफ़िमक याकेसोत मिँर बनै चिर्लनी बिर्ल याघज़्याव रँःद, ३९येसु नो फ़िमल पसिद, “काराव इताव च्याउँनी म्याउँ लँःसिद जेघज़्याव?

लुजा मासिए, अइज डल्द ले,” है ओरादोक ते, ४० येसुलाई हसैकेर। हाःत ज़ येसुए मिं भरी लाँःदा परींद नो लुजाए ओबाबु ओआमानी सोनो ओलस लिज़्याव सोम्लो उसिसरालाई वाज़ लाँद लुजाए उकुन्तील पसिद, ४१ नो लुजालाई उकुइनी क्योःद, “तालिता कूमी,” है दोक्यो। (तालिता कूमीए ओअर्थ — अ बुची, सोनिके।) ४२ हो प्राइँना ज़ नो लुजा थर च्याँःसिद आदा होदा लिके। नो लुजा बाह बर्सवाकाव ओल्यो। निताव रँःद नोर बनै अचम्ब ज़ ताकेर। ४३ नकिन येसुए, “आव येन सुलाई ज़ है तारादोच्यो,” है लिद अर्थेद, “आवलाई ज़्यान्यार जैदिचिके,” है यादोक्यो।

येसुलाई ओमान नैद यामायो

(मती १३:५३-५८; लूका ४:१६-३०)

६ येसु ननी पुलुस्द ओल ओनाखारल ज़ बाके। उसिसर मनी ओलस ज़ यालिज़्याव। २ न्नासिन्या छ्याम उहुवत धर्मसास्त्र फ़िमक बाद येसुए परमेस्वरए ओपाँ ओरासथैज़्याव। नो पाँ थैज़्यावर बनै अचम्ब ताद, “आवए इताव अचम्बलाव पाँर, अचम्बलाव सक्तीर कातानी ओरैव? आवए ओदैव किताव ग्यान ओल्यो! ३ काता, आव नो सीं तुज़्याव माःक रो? आव नो गेस

लिज़्याव मरियमए ओजा ज़ सानी। आव ते याकूब, योसेफ, यहूदा सोनो सिमोनराए यादाज्यु ज़ सानी। ओबैनीर मनी गेस ज़ लिज़्यार,” है लिद जाँ सोव माँःती जैकेर।

४ येसुए नो यापाँ सैद, “अगमबक्ता-लाई ओल ओनाखारलावर सोनो ओक्याँदाडावराए वाज़ ओमान नैद माएर, उपुर्कावराए ते नैदिज़्यार,” है यादोक्यो। ५ है जैद येसु नक उलिज़्याक अचम्बलाव येनर ब कोसै मादोधुक्यो, खाली तोबो नेब्लो याजोरो हुवरालाई वाज़ याक्याँत उकुइ नैदचाद यासगराँक्यो। ६ ओललाई यायुँ ओमाहुपज़्यावए येसु अचम्ब ताके।

येसुए उसिसरालाई ओरापरींव

(मती १०:१,५-१५; लूका ९:१-६)

येसु ननी पुलुस्द नाखार नाखार बाद परमेस्वरए ओपाँ यासथैनाक्यो। ७ हाः बेलाक बाह जना उसिसरालाई ओल्योक खुल्द नोरालाई नेबरें नेबरें जैद माचाव पुरूसर पले-न्या सक्तीर याद यापरींक्यो, ८ “येमत जेबाक जेस काता ज़ तालाँच्यो। जेकुइताव भुइस वाज़ बाच्यो। अर्नी तादी ब, भैं तादी ब, जेवाँःत पैसा तादी ब, काता ज़ तालाँच्यो। ९ जेखँताव पोला सोनो जेक्याँताव क्वास वाज़ बाच्यो,” है लिद याअर्थेक्यो।

१० फरी, “जो फिमक जेपसिज़्या नो नाखारनी जेमापुलुसा पै नक ज़ लिच्यो। ११ फरी जेबाव पोल जेलाई ल्यो मायाद जेपाँ ब थैव यामाभैःकिन नो पोनी जेपुलुस्क नोरालाई चेतावनी यान्याए जूनी जेखँताव गालो धुइरो ब नल ज़ थरैद ख्यानैद याराएच्यो,” है लिद यापरीक्यो।

१२ है जैद नोर ननी पुलुस्द बाद प्राइँलाई ज़, “मादान्या जेदोज़्याव भरी रास्द जेयुँ परमेस्वरए ल्योदा फकैचिके,” है लिद यारासथैकेर। १३ मिँराए याक्याँताव माचाव पुरूसर मनी कुधु ज़ यारापलेकेर, याजोरो हुवरालाई ब परमेस्वरए उमिननी मास थीद नोरालाई यारासगराँकेर।

रील सछैँज़्याव यूहन्ना उसिउ

(मत्ती १४:१-१२; लूका ९:७-९)

१४ हाः बेलाक येसुए उमिन बनै ओथास्नावए हेरोद राजाए मनी ओय़ेनर थैक्यो। येसुए उजूनी ख्वाराए, “आव ते रील सछैँज़्याव यूहन्ना जन्द ची उहुव सा। है जैद ज़ ताखेहो नाः सक्तीलाव येनर ओदोज़्याव।” १५ ख्वाराए फरी, “आव ते एलिया ची सा।” ख्वाराए फरी, “भाःकाव अगमबक्ता मितावर फरी तोबो उपुलुसो ताखेहो,” है यालिज़्याव।

१६ ओल हेरोदए फरी निताव पाँर थैद, “ओहो! ओइँ च़मद डासैःव यूहन्ना ते जन्द ची हुके काना,” है लिके।

१७ नो हेरोदए ड़ादा ओभाइ फिलिए ओज्या हेरोदियासए ओपाँनी यूहन्नालाई क्योःद किद भयाल-खानाल भाःद ओनैज़्याव। हेरोदए हेरोदियासलाई ओरैवए, १८ यूहन्नाए नो राजालाई, “नँ नभाइए ओज्यालाई रैन्या माताए,” है ओदोक ते, १९ हेरोदियासए यूहन्नालाई रँःद उरिस चोद, ‘आवलाई कै जैद डासैःके’ लिद उयुँल ओनैज़्याव। खाली सैःन्या मौका ओमादैताव। २० ओल राजाए ते यूहन्नालाई बनै सतलाव धर्मी मिँ ज़ थःरैद ओछेःज़्याव। है जैद नोए यूहन्नालाई जोगोइद नैक्यो। यूहन्नाए ओपाँत फरी उयुँ आँचानी पाँचा ओताज़्यावत ब सर्बा थैःन्या युँ ओदोज़्याव।

२१ तछा राजा हेरोद उजर्मिउ छचाम मानिन्या उहुवत ओज्याए मौका छुपिक्यो। नो छचाम मानिन्याए जूनी बनै घ्योःव भत्यार जैद घ्योःव घ्योःव ओकर्मचारीर, फौजीलाव ओअफिसरर स़ोनो गालीललाव घ्योःव घ्योःव मिँरालाई याखुल्क्यो। २२ नो बेलाक ज़ हेरोदियासए मेंमा ओज़ा नो भत्यार ज़्युना हुवराए

याड़ाक बाद स्याद याएक्यो। राजा हेरोद सनो ओपाहुनार बनै खुसी ताद राजाए नो लुज़ालाई, “नँ जो नपैज्या डास निके, हो ज़ डायॉ,” है दोक्यो। २३फरी, “नँ नपैकिन तभा डाराज्या तादी ब डायॉ,” है लिद किज्या भाःक्यो। २४है जैद नो लुज़ा ओआमाए ल्योक बाद, “आमा, डा काता डानिके?” है ओदोक ते, ओआमाए, “रील सछैँज्याव यूहन्नाए ओडै निके,” है दोक्यो।

२५नो लुज़ा बेहार ज़ राजाए ल्योक बाद, “डालाई रील सछैँज्याव यूहन्नाए ओडै ताथील भाःद आख ज़ याँके,” है दोक्यो। २६राजाए नो पाँ थैद उयुँर स्यासे सतेक्यो। खाली ओपाहुनाराए ड़क किज्या ओभाःवए नो लुज़ाए ओपाँ मार्व्याधुक्यो। २७है जैद ओपाल्यारानी तोबोलाई खुल्द, “भयालखानाल लिज्याव यूहन्नाए ओडै च्रमद रैके,” है दाद परीक्यो। नो भयालखानाल बाद यूहन्नाए ओडै च्रमद, २८ताथील भाःद नो लुज़ालाई रैदिक्यो। नो लुज़ाए फरी ओआमालाई लाँदिक्यो। २९छीनी यूहन्नाए उसिसराए नो पाँर थैद ओमोरोलाई चिहुद लाँद गादैकेर।

येसुए पाँच हजारलाई भरेस ओरायो

(मत्ती १४:१३-२१; लूका ९:१०-१७;

यूहन्ना ६:१-१४)

३०येसुए नो ओरापरीव ओसाचीर ओल्द हुद ओल्योक दुप्सिद यादोव येन भरी, यारासथैव पाँ भरी है दोकेर। ३१नकिन येसुए नोरालाई, “जे जाँवा पै नासिन्याए जूनी डास तोबो साइँसुइँवक हुव ताके,” है यादोक्यो। काराव ल्यो ताकिन हो बेलाक मिँर याल्योक बनै कुधु ज़ आदा होदा लिन्यार यातावए काँर ज़्यान्या ब यामाधाःज्याव। ३२है जैद येसु उसिसरास दोङ्गाल पसिद तोबो साइँसुइँव पोक बाकेर। ३३खाली मिँराए याबाज्याव रँःद, “नोर ज़ याल्यो,” लिन्या सरैस्द प्राइँनी ज़ धोंःहुद दह छयो छयो बाद नोरालाई बलेद याड़ात ज़ केस्नाकेर। ३४येसु दोङ्गातिन उभरिउ प्राइँना मिँर बनै माहोल्या यारँःक्यो। नोर यागावला माल्यो बेधा स्यासोर यातावए येसुए उयुँ नाद परमेस्वरए ओपाँर कुधु ज़ यासथैक्यो।

३५जाँ रिमदा रिमदा येसुए उसिसर ओल्योक हुद, “गे इताव साइँसुइँवक गेलिज्या, नम ब नुप्नाके। ३६आव

माहोल्यारालाई आजीलाव नाखार जीदा यापरीके, ज़्यावर लँ:द घज़्युरक,” है यादोक ते, ३७येसुए, “आवरालाई ज़्यावर जे ज़ याव ताके,” है ओरादोक ते, उसिसराए, “हुकी आवरालाई नेसय तोला चाँदीए उमींवा भरेस रैदचान्या है नलिज़्याव रो?” है यादोक ते, ३८येसुए, “जेस भरेस खागोता उलिज़्याव, चिऊनाचिके,” है ओरादोक ते, नोर चिऊनाद गनिद, “गेस भरेस पाँच गोता, डाँ: नेब्लो वाज़ लिज़्या,” है दोकेर।

३९हा:त ज़ येसुए उसिसरालाई नो माहोल्यारालाई पीव छी ल्यो बाँल ताना ताना जैद सोचोइँव यापरीक्यो। ४०नोर पचास पचास सोनो सय सयलाव ताना जैसिद चुसिकेर। ४१हा:त ज़ येसुए नो पाँच गोता भरेस नेब्लो डाँ: उकुइत रैद स्वर्गदा भाल्सिद, असिक निद भरेसर के:द उसिसरालाई नो माहोल्याराए याड़ाक याड़ाक भा:दचाव यापरीक्यो। फरी नो नेब्लो डाँ:निलाई मनी हिताव ज़ जैद भा:द याएक्यो। ४२नोर प्राइँए याफू तसी ज़्युकेर। ४३नो यासयेलो भरेस सोनो डाँ:ए उकुतुरार यादुप्क बाह भुर्नु ताके। ४४नो भरेस ज़्याज़्यावर खेपार वाज़ पाँच हजारा याल्यो।

येसु री तर्त तर्त ओबाव

(मत्ती १४:२२-३३; यूहन्ना ६:१५-२१)

४५हा:त ज़ येसुए उसिसरालाई दोङ्गाल पसिउ परींद दह होफताव बेथसेदा यादोज़्याव पोदा ओलकिन ड़ादा ज़ यापरीक्यो। ओल येसुए ते नो माहोल्यारालाई याफ़िमदा याफ़िमदा ओरापरींज्याव। ४६नोरालाई ओरापरींधुव छींनी ओल तोबो दाँदात बाद पोंखारिनाक्यो।

४७नम ओभयानाक उसिसर दोङ्गात दह माँजल ज़ यालिज़्याव। येसु ओबातड पाखाक उलिज़्याव। ४८छींनी बतास उसिसराए ल्योदा बनै चोइस हुद नोर यादोङ्गालाई बनै धो धो यालाँज्याव। येसुए नोरालाई रँ:द रीलाव तीन बजेवाक री तर्त तर्त याल्योदा ज़ बाके। यालापनिकाव घ्यॉ बाव ओपैंज्याक, ४९नोराए येसुलाई री तर्त तर्त उहुज़्याव रँ:द, “आव ते भय्या ची सा!” लिद, ५०बनै छे:द चिर चिर किकेर। हा:त ज़ येसुए, “ताछे:च्यो, जेयुँ होलाँ जैचिके, डा ची,” है दाद, ५१यास दोङ्गाल उपसिउ प्राइँना ज़ बतास ब थकनिके। निताव रँ:द उसिसर बनै अचम्ब ताकेर। ५२येसुए निताव भरेस ओसबाव:व रँ:द ब ओयेन चावस यामाथ:रैताव। यायुँ बनै खाव ओतावए मातीधुकेर।

येसुए याजोरो हुवरालाई ओरासगराँव

(मत्ती १४:३४-३६)

५३ दह होफताव गनेसरेत यादोज्याव पोड केस्द यादोज्जालाई दह छचोक सुर्द, ५४ पाखाक यापुलुसो प्राईंना नलाव मिंराए येसुलाई बेहार ज़ सरेस्द, ५५ नजीलाव भरिल सरसाप बाद याजोरो हुव भरिरालाई याभेलोज्जारास घुर्द येसु जोक जोक बाज्या होक होक ज़ यारालाँकेर। ५६ है जैद सहरल तादी ब, नाखारल तादी ब, पाखाड तादी ब येसु जोक बाज्या, होक ज़ मिंराए याजोरो हुवरालाई तोबोक यारादुज्याव। नोराए, “नक्वाए उतुपा वाज़ छापो गेदैक,” है दाद छापो भरी ओपोःस ज़ गराँकेर।

यहूदीराए यापुर्खारानी हुव चलन

(मत्ती १५:१-६)

७ यरूसलेमनी हुव फरिसीर स़ोनो सास्त्रीर येसुए ल्योक यादुप्सिउत, २ येसुए रूवा रूवा उसिसराए याकुइ माचोखोइसिद काँ याज्युज्याव यारारँःकेर। ३ फरिसीर स़ोनो उपुर्काव यहूदी भरिराए यासाखा पुर्खारानी हुव चलन दाद

याकुइ यामाचोखोइसिवा पै काता ज़ यामाज्युज्याव। ४ फरी बजारनी याहुवत ब रीए यामाचोखोइसिवा पै काता ज़ यामाज्युज्याव। छुत भाःकिनकाव चलनर ब कुधु ज़ यादोज्याव, कैताक ज़ार याचोखोइज्याव, कैताक खुरीर भोप्कार याचोखोइज्याव।

५ है जैद नो फरिसीर स़ोनो सास्त्रीराए येसुलाई, “नसिसराए काराव गेसाखा पुर्खारानी हुव चलन यामादोज्याव? आवराए याकुइ माचोखोइसिद ज़ ज्युज्यार,” है यादोक ते, ६ येसुए, “जे मिताव कैफतीराए जूनी यसैयाए डादा ज़ थिक सर्द नैदचाचिउ। नोए ओसरो आव ज़,

‘आवराए यायाःए वाज़

डामान नैदचाँज्यार।

यायुँ ते डाकिन तादाड लिज्या।

७ मिंराए याससैव चलनलाई

सघ्योःद,

अनाकल ज़ डासेवा दोज्यार।’

८ है जैद जे परमेस्वरए ओकानुनलाई रास्द भन मिंराए याजैव चलनलाई जेमानिज्या। ९ निताव दान्यात बनै ज़ जेजम्कैज्या — परमेस्वरए ओकानुनलाई रूवाद, जेचलनलाई जेसघ्योःज्या। १० अछादी परमेस्वरए ओकानुन सज़्याव मोसाए इताव सर्द नैव,

‘बाबु आमाए ओमान नैदचाव ज़
परिए।’

सोनो,

‘जोए ओबाबु ओआमाए उमिन
बले-दिज़्याव,
होलाई सैःव ज़ परिए।’

११-१२ जे ते भन, ‘जोए ओबाबु
ओआमानिलाई, ‘जिन डानिकाव
दैव परिन्त्या भरी कुर्बान ताद ले,’
है उलिकिन, नो मिँलाई ओबाबु
ओआमानी निभार मालागिद काता ज़
याव मापरिए,’ है जेलिज़्या। (कुर्बानए
ओअर्थ — डाधन भरी परमेस्वरए
उमिनत नैसिउ लिज़्या।) १३ है जैद जे
निताव जेसाखा पुर्खारानी हुव चलननी
परमेस्वरए ओपाँलाई अनाकलाव ज़
जेजैज़्या। हो मिताव येन छुत मनी
कुधु ज़ जेदोज़्या,” है यादोक्यो।

मिँलाई बले-न्या पाँर

(मत्ती १५:१०-२०)

१४ नकिन येसुए नक लिज़्याव
माहोल्यारालाई ओल्योदा खुल्द,
“आव डापाँ जे भरिए थैद चावस
थ-रैच्यो, १५ पाखानी क्याँल पसि-
ज़्यावए मिँलाई माछेंव माजैधुव।
मिँलाई माछेंव जैज़्याव ते क्याँनी
पुलुस्ज़्यावए ची। १६ [आव पाँ

जोए थैन्त्या उयुँ लिज़्या, चावस
ओथैवक,”] है लिद यासथैक्यो।

१७ हाःत ज़ येसुए नो माहोल्यारालाई
ख्यानैद तोबो फ़िमल उपसिउत
उसिसराए नो पाँए ओअर्थ सुधिकेर।

१८ येसुए, “जे मनी अफ़ डापाँ जेमाती-
धुज़्याव रो? याःनी पसिज़्याव ज़्यावए
मिँलाई माबले-व लिन्त्या जेमासैए रो?

१९ नो ज़्याव युँदा माबाए, अइज़ फूल
पसिद छींनी पुलुस्द बाज़्या।” नो
पाँनी ज़ येसुए ज़्याव भरी चोखो ज़

थ-रैक्यो। २० फ़री, “मिँलाई बले-ज़्याव
ते युँल सिजैद याःनी पुलुसज़्याव पाँए
ची। २१ युँलाव माचाहिउ पाँर आवर

ज़ — माचाव चेतैन्त्या, पातज्या पातर्नी
जैसिन्या, कुन्या, मिँ सैःन्या, अर्काए
ओज्याए ल्योदा बान्या, २२ अर्काए

उमीं कोसै रँःन्या, माचाव येन दान्या,
धुत पाँन्या, जोत ब युँ मानैधुन्या, मी
तून्या, अर्काए उमिन बले-दचान्या,

स०द सच्योःसिन्या, उर्ती माल्यो
जैसिन्या, २३ आवर ज़ युँनी पुलुस्द
मिँलाई बले-न्या पाँर।”

छुत जातलाव सिरियालाव मेंमा

(मत्ती १५:२१-२८)

२४ येसु ननी पुलुस्द तुरोस सोनो
सीदोन खन्द त०दा बाके। नल तोबो

भिमल पसिद, 'आल डाहुव सुए ज़ यामासैकिन ताखेहो,' है उलिज़्यावत ब मामोंसिधुके। २५ बेहार ज़ तोबो मेंमाए, 'येसु हुके दी' लिन्या थैद ओल्योक हुद उखँत फुलुप्सिके। नोए मेंमा ओज़ालाई माचाव पुरूसए क्योःद ओनैज़्याव। २६ ओल मेंमा फरी ग्रीक जातलाव ओल्यो, उभिम सिरिया फोनिके खन्दल ओल्यो। नोए, "अ प्रभु, डाज़ाए ओक्याँताव माचाव पुरूस पलेःद एके," लिद बिन्ती चरैःव ज़ ओनैज़्याव। २७ येसुए फरी, "लुज़ाराए याज़्युज़्याव ज़्याव नैद काःरालाई† यान्या माताए। डादा लुज़ार घवाँःरक," है ओदोक ते, २८ नो मेंमाए, "हैज़ प्रभु, हैदी ब लुज़ाराए यासयेलो ज़्यावर तेबल खँकाव काःराए मनी ज़्याव दैर सानी," है ओदोक ते, २९ येसुए, "आव नपाँए ज़ नज़ाए ओक्याँताव माचाव पुरूस पुलुस्द बाधुके, नँ नभिमदा चावस बान्के," है ओदोक ते, ३० नो मेंमा उभिमक ओबाक ओज़ालाई तैत घ्याँसिद उलिज़्याव रँःक्यो। माचाव पुरूस ओबाधुव ओल्यो।

येसुए ओर्ना माथासोलाई थैन्या ओजैव

३१ नकिन येसु तुरोसनी पुलुस्द सीदोन स़ोनो देकापोलिसलाव घ्याँ गालील दह छचोक बाके। ३२ नलाव मिँराए येसुए ल्योक तोबो ओर्ना माथासो स़ोनो मापाँधुन्यालाई रैद, "आवए ओक्याँत नकुइ नैद सगराँके," है यादोक ते, ३३ येसुए नोलाई माहोल्यारानी अछतड लाँद ओआडुला ओर्ना कुँल भाःदचाद ओसेत उतिल भाःदचाद, ३४ नमदा परमेस्वरए ल्योदा भाल्सिद, ख्योःव स० दोहोरैद नो मिँलाई, "इफफाता," है दोक्यो। (इफफाताए ओअर्थ — नर्ना ओफैसिक।) ३५ हो प्राइँना ज़ नो मिँए ओर्ना फैसिद थैन्या ताके। ओसेर ब पलास्सिद चावस ज़ पाँके। ३६ हाःत ज़ येसुए नक लिज़्यावरालाई, "आव डादोव येन सुलाई ज़ है तारादोच्यो," है लिद याअर्थैक्यो। खाली नोराए खा ओराअर्थैव हाःज़ नो पाँलाई फीजैद यारासथैकेर। ३७ नोर बनै अचम्ब ताद, "काता आः चाव येन ओदोज़्याव। यार्ना माथासोरालाई ब

†७:२७ यहूदीर या सघ्योःसिद छुत जातलावरालाई काः मितावर याडम्सिज़्याव। खाली आव पाँ येसुए नो मेंमालाई सज़िम्याए जूनी माःक, उयुँ उहुपज़्याव सँ ओमाहुपज़्याव लिद ओजाँचिउ ची।

थैन्या याजैज्याव, मापाँधुन्यारालाई ब पाँधुन्या याजैज्याव,” है यालिज्याव।

येसुए चार हजारलाई भरेस ओरायो

(मत्ती १५:३२-३६)

फरी तछा येसुए ल्योक मिँर बने माहोल्या दुप्सिहुद यालिज्याव। यास ज्यान्यार प्राइँ खेम्द उलिज्याव। है जैद येसुए उसिसरालाई ओल्योदा खुल्द, २“आव माहोल्यार रँ:द डायुँ नाज्या। आवर डास याल्यो आछिम सोंला ताकेर। याज्याव भरी ब खेम्के। ३आवरालाई अइज्ज फिमदा परींकिन येमत याकरेए माधुन्या लेर। आवर रूवा रूवार ते तादानी हुवर लिज्यार,” है ओरादोक ते, ४उसिसराए, “इताव साइँसुइँवक आ:काव मिँरालाई कातानी ज्यावर रैद सव्रॉन्या की?” है यादोक ते, ५येसुए, “जेस भरेस खागोता उलिज्याव?” है ओरादोक ते, “भरेस सात गोता लिज्या,” है दोकेर।

६नकिन येसुए नो माहोल्यारालाई नामक चुसिउ परींद नो सात गोता भरेस उकुइत रैद, धन्याबाद चरै:द नो भरेसलाई के:द उसिसरालाई नो माहोल्यारालाई भा:दद्याव ओरापरींक ते, भा:द याराएकेर। ७नोरास डाँ:जुँर ब नेबरेंवा यालिज्याव। येसुए नोरालाई मनी उकुइत रैद, असिक

निद माहोल्याराए याड़ाक याड़ाक भा:दद्याव यापरींक्यो। ८नोराए याफू तसी ज्याद यासयेलो यादुप्क सात भुर्नु ताके। ९नो भरेस ज्युज्यावर चार हजार याल्यो। नकिन येसुए नो माहोल्यारालाई याफिमदा याफिमदा यापरींक्यो। १०ओल बेहार ज उसिसरास दोङ्गाल पसिद दलमनुथा खन्द जीदा बाकेर।

फरिसीराए स्वर्गताव सरेस याखिमो

(मत्ती १६:१-४)

११नल फरिसीर येसुलाई जाँचि-न्याए जूँनी ओल्योक हुद खर्लेसिद, “गेलाई स्वर्गताव नसरेस तोबो सतैदद्याव ताके,” है यादोक ते, १२येसु ओनालर व्रयाद, “आव जुकलाव मिँराए काराव सरेस वाज्ज याखिम्ज्याव? डा साचो है डादाचिज्या, आव जुकलाव मिँराए डासरेस काता ज्ज दैन्या मालेर,” है दाद, १३नोरालाई ख्यानैद उसिसरास दोङ्गाल पसिद दह होफत बाकेर।

फरिसीराए यापाँनी जोगोइसिन्या

(मत्ती १६:५-१२)

१४येसुए उसिसराए यास भरेस लाँन्या में:द यानैज्याव। दोङ्गाल नोरास भरेस तोबो वाज्ज उलिज्याव। १५याबाज्याक येसुए नोरालाई सम्जैद,

“जे हेरोद राजा सोनो फरिसीराए भरेसल याभाःज्याव वासःनी जोगोइसिद लिच्यो,” है ओरादोक ते, १६नोर, “भरेस रैन्या गेमेंःवए नै ओदासिज्याव ताक्या,” है लिद या याल यापाँनाज्याव १७येसुए थैद, “काराव डापाँलाई भन भरेस त०दा जेथःरैनाज्याव? आःपै जेमातीधुइ रो? काता जेयुँ आः खाव उलिज्याव? १८जेमी लिज्यावत ब जेमार्ःधुज्याव रो? जेर्ना लिज्यावत ब जेमाथैधुज्याव रो? काता घरी जेमेंःधुव, १९पाँच गोता भरेसए पाँच हजारए याफू तसी ज्यादकाव यासयेलो जेदुप्क खाभुर्नु ओताव?” है ओरादोक ते, “बाह भुर्नु ताके,” है दोकेर। २०“फरी सात गोता भरेसए चार हजार मिँए याफू तसी ज्यादकाव यासयेलो जेदुप्क खाभुर्नु ओताव?” है ओरादोक ते, “सात भुर्नु ताके,” है दोकेर। २१येसुए फरी, “कै जैद आःपै जेमाबुभिधुज्याव?” है यादोक्यो।

येसुए उमी मारैःवलाई ओसगराँव

२२नकिन येसु उसिसरास बेथसेदा नाखारल बाकेर। नक मिँराए तोबो उमी मारैःवलाई ओल्योक रैद, “आवलाई छुद सगराँके,” है यादोक ते, २३येसुए

नो उमी मारैःवलाई उकुइनी क्योःद दौरैद नाखारनी अछतड लाँद, उमीत तिल्दचाद ओक्याँत उकुइ नैदचाद, “कातार नमारैःज्या?” है ओदोक ते, २४नोए आदा होदा भाल्सिद, “रँःन्या ते डारैःज्या, खाली मिँर ते सीर आदा होदा याबाज्याव स्यासो डारारैःज्या,” है दोक्यो। २५हाःत ज़ येसुए फरी नोए उमीत उकुइ नैद ओएक ते नो मिँए लँ लँ चिऊद प्राइँ ज़ छर्लङ्ग रँःक्यो। २६है जैद येसुए नोलाई, “नाखारल मापसिद ज़ नभिमदा बान्के,” है दाद परीक्यो।

**पत्रुसए येसुलाई ख्रीस लिन्या
ओथःरैव**

(मत्ती १६:१३-२०; लूका ९:१८-२१)

२७नकिन येसु उसिसरास कैसरिया फिलिप्पी सहर लापजीकाव नाखार नाखार याबाज्याक येमत येसुए उसिसरालाई, “डालाई मिँराए सु है दाँज्यार?” है ओरादोक ते, २८उसिसराए, “ख्वाराए रील सछैँ-ज्याव यूहन्ना है दीँज्यार, ख्वाराए एलिया है दीँज्यार, ख्वाराए फरी काताकाव अगमबक्ता ताक्या है दीँज्यार,” है यादोक ते, २९येसुए, “जे डालाई सु है जेदाँज्या नी?” है ओरादोक ते, पत्रुसए, “नँ ख्रीस ज़,”

है दोक्यो। ३० नकिन येसुए नोरालाई, “डा हो ज़ लिद सुलाई ज़ है तारा-दोच्यो,” है दाद याअर्थेक्यो।

येसु उसिन्याए जूनी डादा ज़ ओपाँव

(मत्ती १६:२१-२३; लूका ९:२२)

३१ हो बेलाक येसुए, “डा मिँ मिन्सिउए कुधु दुखर दैद आव गेदेसलाव सेरर, मुख्या पुजारीर स़ोनो सास्त्रीराए ल्योनी सोसी निन्या डातारिज़्या। नोराए यासै:नाव स़ोलात सिउनी सैसिद डासोरिज़्या,” है दाद, ३२ उसिसरालाई ओक्याँत हुरिज़्याव दुखर डादाकिन ज़ छर्लङ्ग सतैद याएक्यो। हा:त ज़ पत्रुसए येसुलाई तँदा लाँद उसिडार्क ते, ३३ येसु उछींदा फर्किद उसिस भरिरालाई चिऊद पत्रुसलाई, “ए सैतान, डाडाकिन पुलुस्निके। नँ नयुँ परमेस्वरए ल्योदा माभा:द मिँराए याभा:ज़्यावदा नभा:के,” है दोक्यो।

येसुए उसिस जैसिन्या

(मत्ती १६:२४-२८; लूका ९:२३-२७)

३४ नकिन येसुए उसिसर स़ोनो नक लिज़्याव माहोल्यारालाई ओल्योक खुल्द प्राइँलाई ज़, “जोए डास हुन्या युँ दोज़्याव, होए उजिउए मया मादाद क्रुसत सिन्या मिताव दुखर सहिद

डाछींत उहुक। ३५ जोए आव उजिउत ओललाई तान्या वाज़ खिम्ज़्याव, होए उजुनीलाई समैज़्याव। फरी जोए आव उजिउत उजिउए मया मादाद डाजूनी स़ोनो चाव थाए उजूनी दोज़्याव, होए जुनी दैरिज़्याव। ३६ जोए आव मानुवात लिज़्याव भरी दुप्द उजुनीलाई ओसमैकिन नोलाई काता फाइदा ची तायादा? ३७ नोए उजुनीए ओपोल काता यान्या? ३८ जो आव पापी जुकलाव परमेस्वरकिन तँदाडाव मिँराए खार्ल डा स़ोनो डापाँत ओलाज हुज़्या, डा मिँ मिन्सिउ ब फरी छैंव डाचाक्यारास डाबाबुए ओज़गै मगैरास डाहुक डा ब नोलाई रँ:द डालाज हुन्या ले,” है लिद यासथैक्यो।

९ फरी, “डा जेलाई साचो है डादाचिज़्या, आकाव च्याँ:सिद लिज़्यावरानी जे रूवा रूवाराए परमेस्वरए ओराज्या ओसक्तीरास उहुज़्याव जेमारँ:वा पै सिन्या जेमाले,” है यादोक्यो।

येसुए ओज़गै ओसरै:व

(मत्ती १७:१-८; लूका ९:२८-३६)

२ नकिन छ दिनत येसुए पत्रुस, याकूब स़ोनो यूहन्नारालाई याबातड तोबो भें:व गोंत ओलस यालाँक्यो। नक याकेसोत येसुए ओक्याँर तोसिद,

३ओक्वार बनै मी भीःन्या, तक तकौ ताके। आव मानुवात सुए ज़ जती छेदी ब निताव तक तकौ माजैधुर। ४नाःत ज़ एलिया स़ोनो मोसानी नक ज़ सरैःसिद येसुस पाँकिनी। ५नो रँःद पत्रुसए येसुलाई, “गुर्बा, गे आक लिन्या बनै चाव ताके। गे जेलाई स़ोम्लो पाल तङ्गैद गयाच्यो, तोबो नँलाई, तोबो मोसालाई, तोबो एलियालाई,” है दोक्यो। ६बनै याछे-वए पत्रुसए काता पाँन्या लिन्या ब ओमासैँज्याव। ७नाःत ज़ बादल तोबो हुद नोरालाई याकप्क्यो। नो बादल जीनी तोबो गा अइ लिद थास्के, “आव डायुँलाव ड़ाज़ा ज़, जे आवए ओपाँ थैच्यो,” ८है उलिज़्याव याथैव प्राइँना नोर आदा होदा याभाल्सिक उपुर सु ज़ यामाल्यो, येसुलाई वाज़ रँःकेर।

ख्रीसकिन ड़ादा एलिया

(मत्ती १७:६-१३)

६नो गोंतिन याभरिज़्याक येसुए नोरालाई, “आव जेरँःव भरी डा मिँ मिन्सिउ सिद ड़ामासैँसिवा पै सुलाई ज़ है तारादोच्यो,” है ओरादोक ते, १०नोराए सुलाई ज़ है मादाद या याल वाज़, “आव सिद सैँसिन्या

है उलिज़्याव पाँ काता ओताव?” है यालिज़्याव। ११नोराए येसुलाई फरी, “सास्त्रीराए काराव ख्रीसकिन ड़ादा एलिया हुन्या ले है यालिज़्याव?” है यादोक ते, १२येसुए, “हैज़, एलिया ड़ादा ज़ हुद प्राइँलाई ताव परिन्या मिताव जैन्या ले। हैदी मनी आव ब सरसिउ लिज़्या — हो बेलाकाव मिँराए मिँ मिन्सिउलाई दुखर याद बीज्यात जैन्या लेर। १३खाली डा जेलाई आव मनी है ड़ादाचिज़्या, एलिया ते ड़ादा ज़ हुधुके। आलाव मिँराए भन किताव सरसिउ ओल्यो हिताव ज़ जैद नोलाई यामन लागिउ ज़ जैकेर।”

माचाव पुरूसए ओक्योःव छोज्या

(मत्ती १७:१४-२१; लूका ६:३७-४३)

१४येसु नो स़ोम्लोरास उपुर्काव उसिसराए ल्योक याकेस्नाक बनै माहोल्या मिँराए याखार्ल धिरिद सास्त्रीर नोरास याखर्लेसिज़्याव यारारँःकेर। १५हाःत ज़ नो माहोल्या-राए येसु उहुज़्याव रँःद नोर बनै अचम्ब ताद ओल्योक धोंःनाद धो यादोक, १६येसुए नोरालाई, “काताए जूँनी जेखर्लेसिज़्याव?” है ओरादोक ते, १७माहोल्यारानी तोबोए, “गुर्बा, डा नल्योक ड़ाज़ालाई रैद ड़ानै।

नोलाई माचाव पुरूसए लाता जैद नैव। १८नो पुरूस ओक्याँत उहुव बेलाक भन नामक पछारिसिद, ओहार सजम्द, ओयाःनी फुइ गज्या पले-द बनै ख्याङ्ग्याँ खेङ्गे जैज्याव। डा नसिसरालाई, ‘माचाव पुरूस-लाई पले-दिचिके,’ है डारादोक ते मापले-धुकेर,” है दोक्यो। १९हाःत ज़ येसुए, “ए जेयुँ माहुबोर, डा जेस खा ची डालिरिज्याव, खा डासहिचिके! नोलाई डाल्योक रैचिके,” है ओरादोक ते, २०नो छोज्यालाई ओल्योक रैदिकेर। हाःत ज़ नो पुरूसए येसुलाई उरँःव प्राइँना ज़ नो छोज्यालाई बेहार ज़ खागरा खगर० जैक्यो। नो छोज्या नक ज़ गुधु धलिद फलीं फलीं पल्लैसिद ओयाःनी फुइ गज्या पले-क्यो। २१येसुए छोज्याए ओबाबुलाई, “आव खर्किन अइ ओताव?” है ओदोक ते, ओबाबुए, “ज़िम्ज़ाकिन ज़,” है दोक्यो। २२फरी, “आव डाज़ालाई सैःन्याए जूँनी कैताक मेंःल ब ख्याज्याव, कैताक रील ब ख्याज्याव। नँ कातार नदोधुकिन गेल्योदा नयुँ नाद सगराँदचाव ताके,” है ओदोक ते, २३येसुए, “नँ कै जैद डालाई, ‘कातार नदोधुकिन,’ है नदाँज्याव? उयुँ हुबोलाई मातान्या काता ज़ माले,” है ओदोक ते, २४नो छोज्याए ओबाबुए,

“अ प्रभु, डायुँ हुबो ज़ लिज्या, माहुबो डायुँलाई सुहुपदचाँके,” है लिद बनै चोइस ज़ है दोक्यो।

२५हाःत ज़ येसुए मिँर बनै काला मुलु याधोःहुज्याव रँःद नो माचाव पुरूसलाई सिडार्द, “ए लाता भैरा जैन्या पुरूस, नोए ओक्याँतिन पुलुस्द बान्के। फरी नल खर्क ज़ तापसिनी,” है ओदोव प्राइँना ज़, २६नो माचाव पुरूस बनै चिर चिर क्रिद नो छोज्यालाई कारापनी कुरूप जैद पुलुस्द बाके। हाःत ज़ नो छोज्या चबनै सिउ स्यासो ओतावए नो भाल्सिज्यावराए, “उसिउ ची ओल्यो,” है लिकेर। २७खाली येसुए नोलाई उकुइनी क्योःद पोला ओसोचोइक ते थर च्याँःसिके।

२८छीनी येसु उसिसरास फिमल याबातड यातावत उसिसराए, “गे कै जैद नो माचाव पुरूसलाई गेमा-पले-धुव?” है यादोक ते, २९येसुए, “इताव पुरूसलाई पले-न्या ते मापोंखारिवा पै मापले-सिधुइ,” है यादोक्यो।

येसु उसिन्याए जूँनी फरी ओपाँव

(मत्ती १७:२२-२३; लूका ९:४३-४५)

३०येसु उसिसरास ननी पुलुस्द गालील खन्दलाव घ्याँ बाकेर। ‘आल गेलिज्याव सुए ज़ तासैरक’

है उलिज़्याव, ३१ काराव ल्यो ताकिन उसिसरालाई वाज़ पैन्या ओपैज़्याव। नोए, “डा मिँ मिन्सिउलाई तछा मिँराए याकुइत सूपिनारिज़्यार। नोराए डालाई सैःनारिज़्यार। हैदी ब डसिउ सोंलात सैसिद डसोरिज़्या,” है यादोक्यो। ३२नोराए नो पाँ यामाबुफिदी ब येसुलाई सुधिन्या छेःकेर।

घेप्पा जैसिन्या पाँ

(मत्ती १८:१-५; लूका ६:४६-४८)

३३नकिन येसु उसिसरास कफर्नहुमल बाकेर। फिमल यापसिउत येसुए उसिसरालाई, “येमत जे काता खास खासनी खुस खुस जेपाँहुज़्याव?” है ओरादोक ते, ३४नोराए सुए ज़ घाइ मादोकेर, काराव ल्यो ताकिन नोर येमत, “गे सु घेप्पा गेलिज़्याव,” लिद याखर्लेसिहुज़्याव। ३५है जैद येसु नक चुसिद बाह्व जना उसिसरालाई ओल्योक खुल्द, “जो प्राइँरानी डात जैसिउ पैज़्याव, हो प्राइँराए याधूँलाव जैसिद प्राइँए यासेवा दान्या ओजैसिक,” है दाद, ३६तोबो ज़िम्ज़ा लुज़ालाई रैद याडाक सच्याँद, नो लुज़ालाई ओघोइँल छींद, ३७“जोए डामिनत आव मिताव ज़िम्ज़ारालाई यासुम्ज़्याव, होए डालाई ब सुम्नाज़्याव। जोए डालाई सुम्नाज़्याव, होए डालाई वाज़ माःक,

डालाई परींज़्यावलाई ब सुम्ज़्याव,” है यादोक्यो।

गेकिन तँदा लिज़्यावर

(लूका ६:४६-५०)

३८यूहन्नाए, “गुर्बा, तोबोए नमिननी माचाव पुरूसर ओरापलेःज़्याव गेरँःके। नो गेस ओमाल्योए पलेःव गेमाएके,” है ओदोक ते, ३९येसुए, “नोलाई तावैँच्यो, जोए डामिननी सक्तीलाव येन दोज़्याव, होए सिती मिती डामिन बलेःद मायाँव। ४०जो गेकिन तँदा माजैसिए, हो गेस ज़ लिज़्या। ४१डा जेलाई साचो है डादाचिज़्या, जोए जेलाई खीसए उमीर जेल्यो लिद सरैस्द डामिननी तुखुरी री वाज़ ओयाचिदी ब नोए उइनाम जुनी ब दैन्या ज़ ले।”

मिँलाई बलेःज़्याव खँ कुइ

(मत्ती १८:६-९; लूका १७:१-२)

४२फरी, “जोए आव मिताव डालाई यायुँ हुबो ज़िम्ज़ारालाई पापल ओरापारैकिन, नितावलाई ते बुरू ओधेँल राँथै सुदर्चाद समुन्द्रल ख्यान्या पाथ लिज़्या। ४३फरी नकुइए माचावल ओपारैनिकिन नोलाई च्रम्के। नो नकुइए नर्गलाव माजिप्तिन्या मेंःल ख्याव ओदोःज़्याव देखा बुरू अजम्बरी जुनील थूँदचासो

पसिन्या पाथ लिज़्या। ४४ [नर्गलाव रूइराए याभोगोन ब खर्क ज़ माखेमे, में: ब खर्क ज़ माजिप्तिए।] ४५ फरी नखँए माचावल ओपारैनिकिन नोलाई ब चम्के। नो नखँए नर्गल ख्याव ओदोज़्याव देखा बुरू अजम्बरी जुनील थूँदचासो पसिन्या पाथ लिज़्या। ४६ [नर्गलाव रूइराए याभोगोन ब खर्क ज़ माखेमे, में: ब खर्क ज़ माजिप्तिए।] ४७ हो मिताव ज़ नमीए माचावल ओपारैनिकिन, नो नमीलाई कोला·द ख्याके। नो नमीए नर्गल ख्याव ओदोज़्याव देखा बुरू परमेस्वरए ओराज्याल काना ताद पसिन्या पाथ लिज़्या। ४८ नर्गलाव रूइराए याभोगोन ब खर्क ज़ माखेमे, में: ब खर्क ज़ माजिप्तिए।

४९ “मिँ भरी प्राइँ ज़ में:नी सापी दार मिताव तान्या लेर। ५० सापी चाव ज़ लिज़्या, खाली ओदार ओमालिकिन नोलाई कै जैद ची ओदार ल्यो जैन्या? है जैद जे ब सापी मिताव ताद जे जेल खैद लिच्यो,” है यादोक्यो।

ज्यालाई मारास्न्या

(मत्ती १६:१-१२)

१० येसु ननी पुलुस्द यर्दन भै होफताव यहूदिया खन्दल

बाके। नल ब मिँ ब नै माहोल्या ओल्योक याहुज़्याव। येसुए पो पोक ओदोज़्याव मिताव नोरालाई मनी परमेस्वरए ओपाँ ओरासथैज़्याव। २ नल फरिसीराए येसुलाई जाँचिन्याए जूँनी ओल्योक हुद, “ज्यालाई रासो दैसिए सैं मादैसिए?” है यादोक ते, ३ येसुए, “मोसाए ओकानुनल किताव सर्सिउ उलिज़्याव?” है ओरादोक ते, ४ नोराए, “मोसाए ओकानुननी ते रास्न्या कागत तोबो सर्किन रासो दैसिए,” है दोकेर। ५ येसुए फरी, “जेदिउदी ल्योर जेतावए ज़ मोसाए निताव कानुन सर्द ओयाचिउ। ६ भा:ड स्मिस्तील परमेस्वरए मिँ ओजैक खेपा सोनो मेंमानी निजैक्यो। ७ है जैद ज़ खेपाए ओबाबु ओआमालाई रास्द ओज्यास सिप ताद, ८ नोनी तक्याँ ज़ ताज़्यानी। हा:किन नोनी नेब्लो मा:क, तक्याँल गनिसिज़्यानी। ९ है जैद जोनिलाई परमेस्वरए जोरैद निनैव, होनिलाई मिँराए ताराभा:रक,” है यादोक्यो।

१० फरी फ़िमल उसिसराए नो पाँए उजूँनी फरी ब सुधिकेर। ११ है जैद येसुए, “जोए ओज्यालाई रास्द छुतलाई ओरैकिन नोए जारी येन ज़ दोक्यो। १२ हो मिताव ज़ जो मेंमाए

ओरेलाई रास्द छुतस ओरेस्किन हो ब
हिताव ज़," है यादोक्यो।

येसुए ल्योक हुज़्याव लुज़ार

(मत्ती १६:१३-१५; लूका १८:१५-१७)

१३नकिन नलाव मिंराए ज़िम्ज़ा
याज़ारालाई 'येसुए उकुइ नैद असिक
घरायोक्' लिद ओल्योक यारारैकेर।
नो रैज़्यावरालाई उसिसराए सिडार्द
यारारैकेर। १४येसुए निताव रँ:द
उसिसरालाई जाँ रसिद, "नो ज़िम्ज़ा
लुज़ारालाई तारारैच्यो, डाल्योदा हुव
याराएचिके। परमेस्वरए ओराज्या
नितावराए जूनी ज़ लिज़्या। १५डा
साचो है डादाचिज़्या, जोर आव
लुज़ारए माँ:ती परमेस्वरए ओराज्याल
पसिन्या युँ मादोर, नोर खर्क ज़
पसिउ दैन्या मालेर," है दाद, १६नो
लुज़ारालाई ओघोइँल छींद याक्याँत
उकुइ नैद असिक याएक्यो।

अजम्बरी जुनी खिम्ज़्याव धनी

(मत्ती १६:१६-२२; लूका १८:१८-२३)

१७येसु ननी पुलुस्द येमत
ओबाज़्याक तोबो मिँ धों:हुद
ओडाक फुलुप्सिद, "अ धर्मी गुर्बा,
डा अजम्बरी जुनी दैन्या किताव

दान्या?" है ओदोक ते, १८येसुए,
"डालाई काराव धर्मी है नदाँज़्याव?
परमेस्वरकिन धर्मी सु ज़ माले।
१९धर्मसास्त्रलाव सर्सिउ दान्या
मादान्या येनँ नँ ज़ नसैँज़्याखेहो —
मिँ मासै:न्या, अर्काए ओज्याए
ल्योदा माबान्या, माकुन्या, धुत
गोहाई मायान्या, धुतैद माज़्यान्या,
बाबु आमाए ओमान नैदयान्या,"
है ओदोक ते, २०नोए नो पाँर थैद,
"गुर्बा, आव भरी ते ज़िम्ज़ाकिन दाहुव
ज़ डानैज़्या," है ओदोक ते, २१येसुए
नोलाई रँ:द मया दाद, "अभ्र तोबो
नमासयो:ताए। नँस लिज़्याव भरी
यो:द काता ज़ माल्योरालाई भा:द
याएकेदा, नँ स्वर्गताव धन दैन्या नले।
नो येन भरी दाद नँ डाछींत हुन्के,"
२२है ओदोव भरी थैद ओडा: चुम
चुमो जैद उयुँर स्यासे सतेद ओल्द
बाके। नोए ओधन सम्पती बनै कुधु
ज़ ओल्योए मारास्थुक्यो।

येसुए उछींत बाज़्यावर

(मत्ती १६:२३-३०; लूका १८:२४-३०)

२३नो ओबावत येसु उसिसराए
ल्योदा भाल्सिद, "धनी मिँ परमेस्वरए
ओराज्याल पसिन्या बनै धो ताज़्या,"
है ओरादोक ते, २४उसिसर नो पाँत

बनै अचम्ब ताकेर। नकिन येसुए फरी, “साचो ज़ बाबुज़ार, परमेस्वरए ओराज्याल पसिन्या बनै धो ताज़्या। २५ गपए उकुँल ऊँत उछिरिज़्यावकिन धनी मिँ परमेस्वरए ओराज्याल पसिन्या भन धो ताज़्या,” है ओरादोक ते, २६ नोर भन ज़ अचम्ब ताद, “इताव ताकिन ते सुए ची अजम्बरी जुनी ओदैधुरिज़्याव?” है यादोक ते, २७ येसुए नोरालाई चिऊद, “मिँर यानी सु ज़ माबाँचिधुर, परमेस्वरनी वाज़ ताज़्या। परमेस्वरनी मातान्या काता ज़ माले,” है यादोक्यो।

२८ हाःत ज़ पत्रुसए, “गे ते प्राईं ज़ ख्यानैद नछींत हुद गेले,” है ओदोक ते, २९ येसुए, “डा जेलाई साचो है डादाचिज़्या, जोए डाजूनी सोनो चाव थाए उजूनी ओएँःर उफ़िंमर, ओदाज्यु भाइर, ओनाना बैनीर, ओबाबु ओआमार सोनो ओज़ार रास्द याख्यानैज़्याव, ३० होए आव उजिउत ज़ दुख दैज़्यावत ब एँःर फ़िंमर, दाज्यु भाइर, नाना बैनीर, आमार सोनो ज़ार सय दोबोर ब दैन्या ले। फरिकाव जुनील अजम्बरी जुनी ब दैन्या ले। ३१ खाली ख्वा ख्वा डातावर छींत तारिज़्यार, छींतावर डात तारिज़्यार।”†

येसु फरी उसिन्याए जूनी ओपाँव

(मत्ती २०:१७-१९; लूका १८:३१-३४)

३२ नकिन येसु उसिसरास यरूसलेमदा याबाज़्याक ओल डात ओबाज़्याव। उसिसर अचम्ब ताद यालिज़्याव, उछीं उछीं हुज़्यावर फरी छेःद यालिज़्याव। येसुए बाह जना उसिसरालाई अछतड लाँद ओललाई छींनी तान्या पाँ भरी है यादोक्यो — ३३ “गे यरूसलेमदा गेपुलुस्नाज़्या। नल गेकेसोत डा मिँ मिन्सिउलाई मुख्या पुजारीर सोनो सास्त्रीराए याकुइत सूँपिन्या लेर। नोराए डालाई सैःन्या ज़ थःरैद रोमी सरकारए उकुइत याभाःनावत, ३४ नोराए फरी डालाई उल्ली गिल्ली दाद, तिल्द, यारीःनावत सैःन्या लेर। हैदी ब सोंलात सिउनी सैसिद सोन्या डाले,” है यादोक्यो।

याकूब सोनो यूहन्नानी निपाँ

(मत्ती २०:२०-२८)

३५ नकिन जब्दियाए ओज़ानी याकूब सोनो यूहन्नानी येसुए ल्योक हुद, “गुर्बा, नँस जो गिन्निज़्या हो ज़ नयासिने सैँ है गिन्लिज़्या,” है निदोक ते, ३६ येसुए, “डा जिनजूनी

† १०:३१ मत्ती १९:३० चिऊन्या।

काता दादयान्या जिन्पैङ्याव?" है उनिदोक ते, ३७ नोनी फरी, "स्वर्गत नँस तोबो नवोर्दा, तोबो नदाबज्यादा चुसिउ गिन्दैक," है दोकिनी। ३८ येसुए फरी, "जिन आव जिन्निङ्यावए जूनी जिन्मासैए। डा जाँवाक धो सहिउ दुखर डासहिरिङ्या। जिन जिन्मासहिधुरिङ्या नी? रीए ओरागदैङ्याव मिताव, डा ब दुखल डागदिरिङ्या। जिन जिन्मागदिधुरिङ्या नी?" है उनिदोक ते, ३९ "गिन्धुया ज़," है दोकिनी। हाःत ज़ येसुए, "हैज़, डा डादैरिङ्याव धो सहिउ दुखर जिन मनी दैन्या ज़ जिन्ले, दुखल डागदिङ्याव मिताव जिन ब गदिन्या जिन्ले। ४० खाली डावोर्दा डादाबज्यादा चुसिउ यान्या ते डा डाकुइत माले। निताव दैन्या जोलाई यासिउ लिङ्या, होए उजूनी वाज़ लिङ्या," है निदोक्यो।

४१ उपुर्काव दस जना उसिसराए नो पाँ थैद याकूब सोनो यूहन्नानिलाई रँःद यारिस चोके। ४२ नाःत ज़ येसुए उसिस भरिरालाई ओल्योदा खुल्द, "जे ज़ जेसैङ्याखेहो, आव मानुवाताव घेप्पा है यारादोङ्यावर याधूँलावराए डैत बनै अखत्यासोर ताद हाप हाप ख्याङ्यार। ४३ जे जेल ते निताव जैसिन्या माताए। खाली जे ते जो सेर जैसिउ जेपैङ्या, हो प्राइँए यासेवा दान्या ओजैसिक। ४४ सोनो

जेनी जो घेप्पा जैसिउ जेपैङ्या, हो प्राइँए याबाँदा ओजैसिक। ४५ डा मिँ मिन्सिउ ब 'डासेवा घदोरक' लिद डाहुव माःक, कुधुलाई बाँचैन्याए जूनी डाजिउ भाःद यासेवा डादोहुव ची," है यादोक्यो।

येसुए उमी मारैःवलाई रँःधुन्या ओजैव

(मत्ती २०:२६-३४; लूका १८:३५-४३)

४६ नकिन येसु उसिसरास यरीहो सहरल बाकेर। छीनी ते बनै माहोल्यारास ननी पुलुस्द याबाङ्याक तोबो तिमैए ओज़ा बारतिमै उमी मारैःव निद डासिङ्याव येमक चुसिद उलिङ्याव। ४७ नोए 'नासरतलाव येसु हुङ्या दी' लिन्या थैद बनै चोइस, "अ दाऊदए ओथोलाव येसु, डालाई नयुँ ओनाक," है लिद उकिङ्याक, ४८ नो माहोल्याराए, "भ्याउँ तालिनी," लिद सिडार्केर। नोए भन ज़ चोइस क्रिद, "अ दाऊदए ओथोलाव, डालाई नयुँ ओनाक," है उलिक ते, ४९ येसु नक च्याँःसिद, "नोलाई आदा रैचिके," है ओरादोक ते, नो माहोल्याराए नो उमी मारैःवलाई, "नयुँ सुहुप्द च्याँःसिन्के, प्रभुए खुल्निङ्याव," है यादोव प्राइँना ज़, ५० नो मिँ ओकाँःबुलर ह्या ह्यी ख्याद थर च्याँःसिद येसुए ल्योक बाके। ५१ हाःत ज़ येसुए, "डा नजूनी काता दादयान्या?" है ओदोक ते,



(११:७-१०)

नो उमी मारैःवए, “गुर्बा, डा रँःधुन्या डाताक,” है ओदोक ते, ५२येसुए, “बान्के, नयुँ उहुबोए ज़ नगराँके,” है ओदोव प्राइँना नो मिँ रँःधुन्या ताद येमत येसुए उछीँ उछीँ ज़ बाके।

येसुलाई परमेस्वरए उमिनताव राजा
याजैव

(मत्ती २१:१-११; लूका १९:२८-४०;

यूहन्ना १२:१२-१६)

११ येसु उसिसरास यरूसलेम छचोकाव जैतून दाँदाकिन जाँ होकसैकाव बेथफागे स्नो नो बेथानिया नाखार याकेस्नावत येसुए नेब्लो उसिसनिलाई अइ लिद डादा

निपरींक्यो, २“जिन आव गेड़ाकाव नाखारल बाचिन्केदा, नल जिन्पसिउ प्राइँना तोबो आःपै सुए ज़ यामाचेप्ताव बछेरा दैन्या जिन्ले। नोलाई पला-द रैचिन्के। ३सुवाराए, ‘काराव पला-द जिन्लाँज्याव?’ है यादाचिन्किन, ‘गिन-प्रभुलाई चाहिज्या, बेहार ज़ फकैद याचिवा दी,’ है यारादोचिन,” है दाद, नोनिलाई निपरींक्यो। ४है जैद नोनी नाखारल बाद येसुए है अनिदोव मिताव ज़ बछेरालाई येमक, फिम डाकाव साँबिलाक सुर्सिउ दैकिनी। नोलाई निपला-ज्याक ज़, ५नकाव च्याँःसिद लिज्यावराए, “काराव पला-द जिन्लाँ-ज्याव?” है यारादोक ते, ६नोनी येसुए



उनिपैव मिताव ज़ है निरादोक ते भैं:द याराएकेर।

७ है जैद नोनी नो बछेरालाई येसुए ल्योक लाँद याक्वार ओतर्त याभा:वत येसुए नोलाई चेप्क्यो। ८ नकाव लिज़्याव मिँराए याक्वार येमल तैदिकेर। ख्वाराए फरी पाखाजीलाव स्यावलार फूईँद तैदिकेर। ९ नो माहोल्यार ख्वार येसुए ओड़ात, ख्वार उछींत जैसिद अइ लिद क्रिए क्रिए बाकेर,

“होसन्ना! परमेस्वरए उमिनत हुव

राजा धन्याकाव ओताक।

१० गेपुर्खा दाऊद राजाए उमिनत हुव

राज्या जय जय ओताक,

स्वर्गताव परमेस्वरए उमिन

बनै ओघ्यो:क।”

११ है जैद नोर यरूसलेमल याकेसोत येसु ध्यान फ़िमल पसिद आदा होदा प्राईँदा चिऊद जाँ कुबिला ओतावए ननी पुलुस्द बाह जना उसिसरास बेथानियादा बासिनाकेर।

ओसै माल्यो नेभारा सीं

(मत्ती २१:१८-१९)

१२ हो परा:ती बेथानियानी पुलुस्द याबाज़्याक येसु ओकरेक, १३ जाँ होकसै ओख्यार लपलपौ नेभारा

सीं तोबो रँ:द ‘ओसैर ले सैं’ लिद उचिऊनाक ओसै तोबो ब मादैक्यो। सैन्या बेला ओमातातावए ओख्या वाज़ उलिज़्याव। १४ निताव रँ:द येसुए नो सींलाई, “आकिनी नसै सुए ज़ ज़्याव तादैरक,” है ओदोज़्याव उसिसराए थैकेर।

येसुए बेपारीरालाई ध्यान फ़िमनी ओरापले-व

(मत्ती २१:१२-१७; लूका १९:४५-४८;

यूहन्ना २:१३-२२)

१५ हा:त ज़ येसु उसिसरास यरूसलेमल केस्केर। ओल ध्यान फ़िमल पसिद नलाव लँ:ज़्यावर यो:ज़्यावरालाई पले:द, पैसा तो:ज़्यावराए यातेबलर पल्लैदचाद, कुइतम यो:ज़्यावराए याकुर्चीर ब ख्यादचाद, १६ सुलाई ज़ यासमानरास ध्यान फ़िमलाव घ्याँ आदा होदा बाव मायाद, १७ येसुए नोरालाई, “धर्मसास्त्रल परमेस्वरए ओपाँ इताव सर्सिउ ओमालिज़्याव रो?

“डा डाफ़िम प्राईँ जातलाव

मिँराए जूँनी

पोंखारिन्या फ़िम जैसिउ लिज़्या।’ जे ते भन आवलाई चोरराए पुप मिताव जैद जेनै,” है लिद यासथैक्यो।



१८नो पाँ नलाव मुख्या पुजारीर सोनो सास्त्रीराए थैद यारिस चोद, 'आवलाई कै जैद गेसै:के?' लिद निउँ खिम्केर। खाली माहोल्या भरी येसुए ओपाँत बनै अचम्ब ताद यालिज़्यावए नो सै:व पैज़्यावर येसुलाई रँ:द याछे:ज़्याव।

१९रिमदा रिमदा येसु उसिसरास सहरनी पुलुस्द बाकेर।

युँ सुहुपद पोखारिन्या

(मत्ती २१:२०-२२)

२०हो परा:ती छकाल्न्या येसु उसिसरास नो नेभारा सीं लिज़्याव येमलाव घ्याँ याबाज़्याक नो सीं ओजरानी थँद उलिज़्याव रँ:केर। २१पत्रुसए नो डादाडाव चेतैद, "गुर्बा चिऊसाँकी, सराप नयो नेभारा सीं ते उथँव ची ओल्यो," है ओदोक ते, २२येसुए उसिसरालाई, "परमेस्वरए ल्योदा जेयुँ उहुपक। २३डा जेलाई साचो है डादाचिज़्या, जोए उयुँ आदा होदा माजैद, 'जुनी ब डादैया ज़' लिद उयुँ उहुपकिन, तोबो हाँलाई, 'नँ नतिन भोस्द समुन्द्रल ख्यासिन्के,' है ओदोकिन, नो हैज़ तान्या ले। २४है जैद डा जेलाई है डादाचिज़्या, जोत जेयुँ हुपद 'डादैया ज़' है लिद जेपोखारिकिन नो दैन्या ज़ जेले। २५परमेस्वरलाई जेपोखारिन्या बेलाक

सुवारास माखैव काता पाँर जेयुँल जेनैकिन, डादा होलाई रास्द बल्ल पोखारिच्यो। हो ताकिन ची स्वर्गताव जेबाबुए जेलाई मनी जेदोव पाप भरी रास्न्या ले। २६[फरी नो मिँलाई रासो जेमाभै:किन स्वर्गताव जेबाबुए जेलाई ब रास्न्या माले,"] है यादोक्यो।

येसुए ओहक सोनो यूहन्नाए ओहक

(मत्ती २१:२३-२७; लूका २०:१-८)

२७येसु उसिसरास फरी यरूसलेमल बाद ध्यान फ़िमल यालिज़्याक नलाव मुख्या पुजारीर, सास्त्रीर सोनो यहूदीराए यास्सेर येसुए ल्योक हुद, २८"आव नदोज़्याव येनर नँलाई सुए है उदींव, सुए हक उईव?" है यादोक ते, २९येसुए, "डा ब जेलाई तोबो है डादाचिदा, नोए ओजवाप जेयाँकिन डा ब आव येन दान्या हक सुए ओयाँव है डादाचिया," है दाद, ३०"रील सछैःज़्याव यूहन्नाए ओयेन परमेस्वरए ल्योनी ताव सैं मिँराए ल्योनी ताव? है दाँचिके," है ओरादोक ते, ३१नोर या याल, " 'यूहन्नाए ओयेन परमेस्वरनी ताव' है गेदचा गेलिकिन, 'हुकी काराव यूहन्नाए ओपाँ जेमाभै:व?' है दान्या ले। ३२फरी 'मिँनी' है गेदचा गेलिकिन मिँराए ल्योनी ओछ्यास लिज़्या," है लिकेर। मिँ भरिए यूहन्नलाई अगमबक्ता ज़ है लिद



थःरैद यानैज्यावए छेःद नै यालिज्याव।
३३ है जैद नोराए येसुलाई, “गेमासैए,”
है दोकेर। हाःत ज़ येसुए मनी, “हो ची
ताकिन्दा डालाई आव येन दान्या हक
सुए ओयाँव डा ब है डामादाच्यो,” है
यादोक्थो।

अधिया कमैज्यावराए घर्ती

(मत्ती २१:३३-४६; लूका २०:९-१९)

१२ येसुए घर्ती भाःद अइ लिद
यासथैक्थो, “तोबो मिँए
ओएँ: भरिल जोम्परसै भाःद, प्राईनी
भार्नाए घिरिद, खादर घोद जोम्परसै
पीन्या कोलो तोबो भाःद, मिँ लिन्या
खोपोरा ब तोबो जैद, नो एँ:लाई
अधियाल याद, ओल तोबो तादा
देसड लिनाके दी। २ नलाव जोम्परसैर
किन्या बेला ओतावत तोबो ओयेन
दाज्यावलाई उजुँ भरी चानाव परीक्थो
दी। ३ नो अधिया कमैज्यावराए
भन नोलाई क्योःद प्रोद रितो ज़
खेपैकेर दी। ४ फरी छीनी छुत ओयेन
दाज्यावलाई उपरीक नोलाई मनी
ओडै पा-दद्याद बीज्यात जैकेर दी।
५ छीनी फरी तोबोलाई उपरीक नोलाई
ते भन सैःकेर दी। हिताव ज़ छुत
ओरापरींवर ब ख्वारालाई याराप्रोकेर
दी, ख्वारालाई यारासैःकेर दी।

६ “ओमापरींव जम्मा तोबो बनै
उयुँलाव ओज़ा वाज़ रहिके दी। है
जैद एँ:ए ओगेँए, ‘आवलाई ताकिन
ओमान नैदिर सै’ लिद प्राईरानी छीनी
नो ओज़ालाई ब परीक्थो दी। ७ खाली
नो ओज़ा उहुज्याव रँ:द नो अधिया
कमैज्यावर भन या या पाँसिद,
‘आव ते एँ: दैन्या मिँ ची, आवलाई
गेसैःकिन आव एँ: गेमीं ज़ तान्या ले,’
लिद, ८ नोलाई क्योःद सैःद पाखाड
ख्याकेर दी।”

९ नकिन येसुए नो मुख्या पुजारीर
सोनो सास्त्रीरालाई, “नो एँ:ए ओगेँए
अधिया कमैज्यावरालाई कै याजैवके
लिक ते, नोर प्राईलाई ज़ सैःद नो
एँ: छुतरालाई यान्या ले,” है दाद,
१० येसुए नोरालाई फरी, “जे आव
धर्मसास्त्रलाव पाँ जेपरिखेहो,

‘भुलीराए कान्ल ज़ माज्यासे

लिद याख्याव लुँ

नो ज़ भन भुयाँरलाव लुँ ताके।

११ आव ओल परमेस्वरनी ताव

पाँर ज़,

इताव रँ:द गे अचम्ब गेताज्या।’ ”

१२ नकिन नो मुख्या पुजारीर सोनो
सास्त्रीराए ‘आव घर्ती ते गेडैत ज़
भाःदद्यासिक्थो’ लिन्या सैद येसुलाई
क्योःव पैकेर। खाली ओलस लिज्याव



माहोल्यारालाई रँ:द छे.केर। है जैद कैज़ माजैद अइज़ बाकेर।

माहाराजालाई सिर्मा यान्या सैं
मायान्या

(मत्ती २२:१५-२२; लूका २०:२०-२६)

१३नोराए छीनी येसुए ओपाँ क्यो:दयान्याए जूँनी फरिसीर स्रोनो हेरोद राजासकावरालाई येसुए ल्योक यारापरीकेर। १४नोर ओल्योक बाद, “गुर्बा, नँ गेस नपाँज़्याव भरी साचो वाज़ लिज़्या। परमेस्वरए ल्योदा बान्या येम ब साचोस नपैसिज़्या। मिँ रँ:द ब नमादोए, सुए ल्योदा ब नमाजैसिए। है जैद गेलाई तोबो पाँ है दाव ताके, माहाराजालाई गे सिर्मा यान्या सैं मायान्या? १५किताव दान्या?” है यादोक ते, येसुए नोराए याकप्तै सैंद, “डालाई काराव जेजाँचिनाज़्याव? पैसा तोबो रैदयाँचिकेदा, डाचिऊरिज़्या,” है ओरादोक ते, १६नोराए पैसा तोबो रैद याएक ते, येसुए, “आत सुए उसुरूप, सुए उमिन उलिज़्याव?” है ओरादोक ते, “माहाराजाए उमीं ज़,” है दोकेर। १७“हो ची ताकिन्दा माहाराजाए उमीं भरी माहाराजालाई ज़ एच्यो, परमेस्वरए उमीं भरी परमेस्वरलाई ज़

एच्यो,” है ओरादोक ते, नोर नो पाँत बनै अचम्ब ताकेर।

सदुकीराए यापाँ

(मत्ती २२:२३-३३; लूका २०:२७-४०)

१८नकिन रूवा सदुकीर ब येसुए ल्योक पजैना हुकेर। सदुकी है यारादोज़्यावराए ‘सिउकिन सैसिन्या माताए’ है यालिज़्याव। १९है जैद नोराए, “गुर्बा, मोसाए ओकानुनल तोबो अइ लिद सर्सिउ लिज़्या, ‘तोबोए ज्या दाद ज़ार मादैद उसिकिन, ओभाइए ओदाज्युए ओथोर माफ्यान्याए जूँनी ओमारूमलाई ओरैवक।’ २०है जैद तोबोए ओज़ार सात भाइ याल्यो। यादाज्युए ज्या दाद ज़ार मादैद ज़ सिके। २१होए उधूँलावए फरी नो ओमारूमलाई रैद नो मनी ज़ार मादैद ज़ सिके। नकिन साइँला मनी हिताव ज़ ताके। २२नितावनी ज़ सात भाइ भरिए ज़ नो मेंमालाई रैद ज़ार मादैद ज़ सिकेर। प्राइँरानी छीनी नो मेंमा ब सिके। २३है जैद नो मेंमा सात भाइए याज्या ओतावए अजम्बरी जुनील काताकावए याज्या तान्या?” है लिकेर।

२४हा:त ज़ येसुए, “जे धर्मसास्त्रलाव पाँ मातीद परमेस्वरए ओसक्ती ब



जेमाथरैधुवए ज़ चबनै बिरेद जेनै।
 २५सिउनी सैसिद स्वर्गत बावर ते सुए
 ज़ ज्या ब मादोर, रे ब मादोर। प्राइँ ज़
 स्वर्गताव चाकज्या स्यासोर ताज़्यार।
 २६फरी जे 'सिउकिन सैसिन्या माताए'
 है ल्यो पैज्यावर धर्मसास्त्रलाव मोसाए
 ओसरोल भोपोरा ओचाँ:ज्याव जेमा-
 प्ररिए रो? नो चाँ:ज्यावनी परमेस्वरए
 ओपाँ अइ लिद हुके,

‘डा अब्राहामए ओपरमेस्वर,

इसहाकए ओपरमेस्वर सोनो

याकूबए ओपरमेस्वर ज़।’

२७ओल ते मोरोराए यापरमेस्वर
 मा:क, जींदोराए यापरमेस्वर ची। है
 जैद जे चबनै बिरेद जेनै,” है यादोक्यो।

प्राइँरानी दान्या येन

(मत्ती २२:३४-४०; १०:२५-२८)

२८येसु सदुकीरास याखर्लेसिज्याव
 तोबो सास्त्रीए थैद, ‘येसुए थिक
 जवाप याएक्यो’ लिद येसुए ल्योक
 बाद, “गुर्बा, मिँए दान्या मादान्या येन
 भरिनी प्राइँरानी दान्या काताकाव
 उलिज्याव?” है ओदोक ते, २९येसुए,
 “सर्सिउ भरिनी प्राइँरानी दान्या आव
 ज़, ‘अ इस्राएलीर थैचिके, जेप्रभु
 परमेस्वर तोबोका तोबो वाज़ लिज्या।

३०जेयुँलाई आदा होदा मादुलैद, जेसा
 मामोंद, जेप्रभु परमेस्वरए ल्योदा युँ
 थू जैद ओललाई वाज़ मया दान्या।’
 ३१होए उछींताव दान्या येन फरी आव
 ज़, ‘जेक्याँलाई किताव जेसमारिज्या,
 छुतलाई ब हिताव ज़ समारिन्या।’
 आव नेब्लोकिन घेप्पा काता ज़
 माले,” है ओदोक ते, ३२नो सास्त्रीए,
 “साचो ज़ है नलिके गुर्बा, परमेस्वर
 तोबोका तोबो ज़ लिज्या, छुत माले।
 ३३फरी नँ है नलिज्याव मिताव युँलाई
 मादुलैद, सा मामोंद, परमेस्वरए
 ल्योदा युँ थू जैद ओललाई वाज़ मया
 दान्या, सोनो छुतलाई समारिन्या बनै
 ओचाहित ल्यो ज़ लिज्या। निताव
 येन दान्या में:नी चरै:न्या पुजा सोनो
 पाथा पल्द चरै:न्या पुजाकिन घेप्पा
 लिज्या,” है ओदोक ते, ३४येसुए नोए
 ना: सैद ओपाँव थैद, “नँ परमेस्वरए
 ओराज्याकिन तादाड नमाले,” है
 दोक्यो। हा:किन सुए ज़ येसुस पाँन्या
 आँत मादोकेर।

ख्रीस दाऊद राजाए ओप्रभु ज़

(मत्ती २२:४१-४६; लूका २०:४१-४४)

३५येसुए ध्यान भिमल लिज्याव-
 रालाई अइ लिद यासथैक्यो,



“सास्त्रीराए ‘ख्रीस दाऊदए ओथो-
लाव’ कातानी है यालिज़्याव?
३६ओल दाऊदए मनी छैव पुरूसनी
अइ लिद पाँद ले,

‘परमेस्वरए डाप्रभुलाई,

‘नसुतुररालाई नखँ धूँल

भाःद डामाईवा पै,

डावोर्दा चुसिद लिन्के,’ है दोक्यो।’

३७है जैद ओल दाऊदए मनी ख्रीसलाई
‘डाप्रभु ज़’ है ओदोकिन नो कै जैद
होए ओथोलाव ओताज़्याव?” है
यादोक्यो। माहोल्याराए येसुए निताव
ओपाँ बनै थै थै डम्सिउ याथरैज़्याव।

येसुए सास्त्रीराए यापाहा भाःद ओरायो

(मत्ती २३:१-३६; लूका २०:४५-४७)

३८येसुए ओपाँ ओरासथैज़्याक
अइ लिद यासथैक्यो, “सास्त्रीराए
यायेननी जोगोइसिद लिच्यो। नोर रेरे
बेन्बेनो क्वा क्वाइसिद ‘प्राइँए धो
घदासिरक’ लिन्या युँ दाद बजार जीदा
दुलिरिज़्यार। ३६नोर फरी धर्मसास्त्र
फ़िमराल, घ्योःव घ्योःव भत्यारल
ब प्राइँए रँःन्याक ओमान ल्यो पोल
वाज़ चुसिउ पैज़्यार। ४०नो सास्त्रीराए
फ़न राँदी मेंमारालाई तँनी छाम छुम
याराख्याज़्यार, मिँराए ड़ाक वाज़

बनै चाव चाव पोंखारिउ जैसिज़्यार।
नोराए ते प्राइँरानी घ्योःव सजा ज़
दैरिज़्यार,” है लिद यासथैक्यो।

राँदी मेंमाए ओचरैःव भिती

(लूका २१:१-४)

४१नल ध्यान फ़िमल येसुए भिती
याचरैःज़्याव बाकस छचोक चुसिद
मिँराए भिती याचरैःज़्याव ओरा-
चिऊज़्याव। धनी धनीराए बनै कुधु
कुधु याभाःज़्याव। ४२नो बेलाक
तोबो काता ज़ माल्यो राँदी मेंमा हुद
नेब्लो पैसा चरैःक्यो। नो नेब्लो थोम्द
तपैसावाकाव ओल्यो। ४३नो रँःद
येसुए उसिसरालाई ओल्योक खुल्द,
“डा साचो है डादाचिज़्या, आव काता
ज़ माल्यो राँदी मेंमाए छुतराकिन कुधु
चरैःक्यो। ४४धनीराए ते यासयेलोनी
वाज़ चरैःकेर। नो राँदी मेंमाए ते
ओललाई ओमाथैःज़्यावत ब ओलस
लिज़्याव भरी प्राइँ ज़ चरैःक्यो,” है
यादोक्यो।

खेन्या बेलाकाव सरैसर

(मत्ती २४:१-२८; लूका २१:५-२४)

१३ येसु ध्यान फ़िमनी पुलुस्द
ओबाज़्याक तोबो उसिसए,
“गुर्बा चिऊसाँकी, काता आः घ्योःव

घ्योःव लुंर, आः चाव फ़िमर,” है ओदोक ते, २येसुए, “हैज़, आव भरी चिऊचिके। खाली छींनी तछा आव भरी तैःद लुंए तर्त लुं ब रहिन्या माले,” है यादोक्यो।

३नकिन जाँवाक येसु ध्यान फ़िम होफताव जैतून दाँदात चुसिद उलिज़्याक पत्रुस, याकूब, यूहन्ना सोनो अन्द्रियासराए अलगज़ा येसुलाई, ४“आव नपाँ भरी खर्क ओतारि-ज़्याव? नोर तान्या सरेस किताव ओतारिज़्याव? गेलाई है दासिके,” है यादोक ते, ५येसुए, “जेलाई सुवाराए भुकैचिन्या, जे सैसिद जोगोइसिद लिच्यो। ६मिँर डा डामिन कुद ‘डा ज़ स्त्रीस’ है लिद कुधु ज़ हुद कुधुलाई ज़ याराभुकैरिज़्यार। ७सोनो ‘आड लरै ताज़्या, होड लरै ताज़्या’ है यालिज़्याव जेथैक जे ताछे-च्यो। आव भरी जुनी ब ताव ज़ परिए, खाली नो खेन्त्या बेला माःक। ८नोकिन डादा जात जात, राज्या राज्या लरै दान्या लेर। पो पोल भोंचालोर अनिकालर ब तारिज़्या। आव भरी मेंमाए ज़ा दैन्या बेलाक ओघर्लिज़्याव मिताव सुरूलाव दुख वाज़ लिज़्या।

९“जे फरी सैसिद लिच्यो। हो बेलाक जेलाई मनी अदालतदा लाँद

सूँपिचिरिज़्यार, धर्मसास्त्र फ़िम फ़िमल जेलाई प्रोचिरिज़्यार। डा डाज़ूनी हाकिमर राजाराए डाक सच्याँद खोले-चिरिज़्यार। ननी ज़ जे नोरालाई डासाची यान्या जेले। १०खेन्त्या बेला ओमाताद डादा चाव था प्राँ जातलाव मिँराए खाल थासो ज़ परिके। ११है जैद नोराए जेलाई क्योःद यासूँपिचिक, ‘डा कै लिन्या, काता पाँन्या ओताव?’ लिद जेयुँ आँचा पाँचा ताजैच्यो। नो बेलाक जो हुज़्या हो ज़ पाँच्यो। नो पाँज़्याव जे माःक, परमेस्वरए छैँव उपुरूस जेस लिद ओल ज़ पाँन्या ले। १२हो बेलाक ओभाइए ओदाज्युलाई, ओबाबुए ओज़ालाई सैःन्या सजाल यारापारैरिज़्यार। याज़ाराए याबाबु याआमाकिन तँदा जैसिद सैःन्या सजाल यारापारैरिज़्यार। १३जे डामिनतावर जेतावए जेलाई प्राँए सोन्या लेर। खाली जो आव दुखर ओमाखेमा पै थरिज़्या, होए ज़ अजम्बरी जुनी दैन्या ले।

१४“आव ब सैच्यो, नो भाःकिनकाव सर्सिउ मिताव तोबो युँ माजामोए ध्यान फ़िमलाव चोखो पोल तोबो फुरी हुद नुल्पा नुल्मा ओजैहुव जेरैःक यहूदियाल लिज़्यावर गों जीदा ओधोंःरक। १५थालात लिज़्यावर ब

याभिमलाव याआल मालर
तात्रानारक। १६एँःल लिङ्यावर मनी
याक्वार चाना याभिमदा ताबारक।
१७हो बेलाक याफूल याजा ल्योर सोनो
नुइँ सवैज्याव आमार युँ नावजार।
१८निताव दुख ज्युँःव साहाक ताताक
लिद परमेस्वरलाई पोखारिच्यो।
१९हो बेलाकाव दुख बनै धो सहिउ
तारिङ्या। निताव दुख आव संसार
परमेस्वरए ओजैवकिन आःपै माहुताए,
निताव दुख नोकिन छीनी ब तान्या
माले। २०निताव बेला तावका ताव ज
उलिकिन सु ज रहिन्या मालेर। खाली
ओल परमेस्वरए छाँतिद ओरानैज्याव
उमीराए जूनी नो बेला सुतुईँदचान्या ले।

२१“नो बेलाक जेलाई सुवाराए,
‘खीस आड हुद ले, होड हुद ले,’ है
यादाचिकिन नोरालाई तारापतिच्यो।
२२रुवार डा डामिन कुद खीस
जैसिद हुन्या लेर, रुवार परमेस्वरए
उपुरुसनी पाँव जैसिद हुन्या लेर।
नोराए अचम्ब अचम्बलाव सरेसर
येनर जैद कुधुलाई भुकैन्या लेर।
परमेस्वरए ओराछाँतिउरालाई मनी
भुकैन्या छ्यास लिङ्या। २३है जैद
जे सैसिद लिच्यो। आव पाँर जेलाई
डादा ज़ है दाद डानैचिए।”

खीस फरी उहुन्या छ्याम

(मत्ती २४:२६-३१; लूका २१:२५-२८)

२४“हो बेलाकाव दुख ओखेमोत
निमी ब चुम चुमो तारिङ्या, स्यावैए
ओजगै ब मारिङ्या। २५सोरोर ब
नमतिन तेरिङ्यार, नमताव भरी
ब यासतर माद थोनो-सिन्या लेर।
२६हाःत ज़ मिँ मिन्सिउलाई बनै
जगै मगैव ओसक्तीरास बादल जींल
उहुङ्याव मिँ भरिराए रँःन्या लेर।
२७हाःत ज़ स्वर्गताव ओचाकज्या
भरी परींद नाम नमलाव काना कुनीड
लिङ्याव चार चौकालाव छाँतिद
ओरानैज्याव उमीरालाई ओल्योक
यादुप्रिङ्याव।”

नेभारा सींए ओसरेस

(मत्ती २४:३२-३६; लूका २१:२६-३३)

२८“नेभारा सींनी आव अर्थ ब
सैंच्यो, किताव सींर यामोम्नाक
‘उभ्याली उहुनाव ची ओल्यो’ है
जेलिङ्या, २९हिताव ज़ नो है डादाचिउ
पाँ भरी ओतानाङ्याव जेरँःक ‘खीस
उहुन्या बेला ओतानाव ची ओल्यो’
लिन्या सैंच्यो। ३०डा जेलाई साचो है
डादाचिङ्या, आव भरी ओमातावा पै

आव जुक खेम्न्या माले। ३१ आव नाम नम ते खेम्न्या ले, डा डापाँ ते खर्क ज़ मान्या माले।”

ख्रीस उहुन्या बेला सुए ज़ मासैर

(मत्ती २४:३६-४४)

३२ “खाली नो छचाम, नो बेला सुए ज़ मासैर। स्वर्गताव चाकज्याराए ब मासैर, परमेस्वरए ओज़ाए ब मासैव, स्वर्गताव डाबाबुए वाज़ सैज़्याव। ३३ है जैद जे सैसिद लिच्यो। आव छचाम हुरिज़्या लिन्या जे जेमासैए। ३४ आव भरी तोबो तादा देसदा बाज़्याव मिँ स्यासो लिज़्या। उक्किम ओख्यानैज़्याव बेलाक ओलसकाव लिज़्याव भरी ओयेन दाज़्यावराए यापासल भाःद सु सु यायेन जैदचाद, ग्राम गुज़्याव पाल्यालाई, ‘सैसिद लिनी,’ है दाद बाज़्या। ३५ है जैद जे ब सैसिद लिच्यो। जेघरपती हुन्या रिमक ताक्या, आधा रील ताक्या, भाल्या कोनादा ताक्या, नम उसँक ताक्या, जे जेमासैए। ३६ सैसिद जेमालिकिन उमँःजानी उहुक जेलाई डल्द जेलिज़्याव दैहुन्या ले। ३७ है जैद जेलाई है डादाचिउ पाँ प्राईलाई ज़ है डारादोज़्या — सैसिद लिच्यो।”

येसुलाई सैःन्या गुमुस्ता

(मत्ती २६:१-५; लूका २२:१-२;

यूहन्ना ११:४७-५३)

१४ निस्तार यादोज़्याव माँदा भरेस ज़्यान्या पर्व नेलाए ओड़ाल उलिज़्याव। हो बेलाक ज़ मुख्या पुजारीर स़ोनो सास्त्रीराए ‘येसुलाई कातानी भुकैद क्योःद सैःन्या ओताव?’ लिद गुमुस्ता यादोज़्याव। २नोर, “पर्व बेलाक माता, मानी मिँ मचिन्या ओछ्यास लिज़्या,” है यालिज़्याव।

येसुए ओडैत मास थीव मेंमा

(मत्ती २६:६-१३; यूहन्ना १२:१-८)

३येसु बेथानिया नाखारल तोबो सिमोन यादोज़्याव कुरीए उक्किमक काँ उज्युज़्याव। हो बेलाक तोबो मेंमाए बनै चाव ज़िम्ज़ा लुँ जाल उसी डरो बनै ओएः ल्यो जतामसीए मास रैद जाए ओडै केःद येसुए ओडैत ओपोःस ज़ थीदिक्यो। ४निताव रँःद नक लिज़्यावर ख्वा ख्वाराए यायुँ वा वा कैद, “आव मेंमाए काराव नाः ओएः ल्यो मास खेर ओभाःज़्याव? ५बुरू नोलाई स़ोंसय चाँदीए सिक्काल योःद नो पैसाए काता ज़ माल्योरालाई



(१४:१७-२६)

भा:द ओराएकिन तान्या ओल्यो,” है लिद नो मेंमालाई सिडार्केर।

६हा:त ज़ येसुए, “घदोऱ्यावक, काराव उयुं के:द जेएऱ्याव? नोए ते डाजुंनी बनै चाव येन दोक्यो। ७काता ज़ माल्योर ते जेस एकतार ज़ लिऱ्यार। नोरालाई जो बेलाक जेराएदी ब ताए। डा ते जेस एकतार लिन्या डामाले। ८आव मेंमाए उधुवा भरी दादचाँक्यो। डा डामासिद ज़ गादैन्या छचामकावए जूनी डामोरोलाई डादा ज़ थीद ओयाँव मिताव ज़ ताके। ९है जैद डा जेलाई

साचो है डादाचिऱ्या, संसार भरिल जोड जोड चाव था यारासथैऱ्यार, होड होड आव मेंमाए ओदोव येन थास्द उमिन ब रहिन्या ले।”

येसुलाई धोका याऱ्याव इस्करियोत

(मत्ती २६:१४-१६; लुका २२:३-६)

१०नकिन बाह्व जना उसिसरानी यहूदा इस्करियोतए येसुलाई मुख्या पुजारीराए याकुइत पारैन्याए जूनी याल्योक बाके। ११नोर नोए ओपाँ थैद

बनै रेंद नोलाई पैसा यान्या ब जैकेर।
हाःकिन इस्करियोतए 'येसुलाई कै
जैद ड़ासूँपिके?' लिद मौका खिम्क्यो।

माँदा भरेस ज़्यान्या पर्व

(मत्ती २६:१७-१९; लूका २२:७-१३)

१२हाःत ज़ नो माँदा भरेस ज़्यान्या
पर्व सुरू ओतावत पाथा पल्ल्या
छचाम येसुए उसिसर ओल्योक हुद,
“नँ कै नलिज़्या, आव पर्व मानिन्याए
जूनी ज़्यावर काङ्क जैनान्या?” है
यादोक ते, १३येसुए नेब्लो उसिस-
निलाई, “जिन सहरल बाचिन्केदा,
नल तोबो री गपद ओघागरी छींद
बाज़्याव मिँ दैन्या जिन्ले। नोए उछीं
उछीं बाद, १४जोल पसिज़्या होल ज़
पसिद नो फ़िमए ओर्गेलाई, ‘नँलाई
गेगुर्बाए है दींज्याव, पाहुना लिन्या
कुन्ती काङ्क उलिज़्याव? आव पर्व
उसिसरास नल मानिरिज़्याव दी,’ है
दोचिन। १५है जिन्दोव प्राइँना नोए
ओतर्ताव तालल तोबो घेप्पा कुन्ती
चावस सजैसिउ जिनलाई सतेंदयान्या
ले। गेज़्याव भरी नल ज़ जैचिन,”
है दाद निपरींक्यो। १६है जैद नोनी
ननी पुलुस्द सहरल बाद है अनिदोव
मिताव ज़ दैद पर्वताव ज़्याव भरी
जैकिनी।

परमेस्वरए उमिनताव भत्यार

(मत्ती २६:२०-३०; लूका २२:१४-२३;
यूहन्ना १३:२१-३०; १ कोरिन्थी ११:२३-२५)

१७हो छचाम रिमक येसु बाह जना
उसिसरास नो फ़िमल दुप्सिहुकेर।
१८नोर चुसिद ज़्यावर याज़्युज़्याक
येसुए, “डा जेलाई साचो है डादा-
चिज़्या, जेनी तोबोए ड़ालाई धोका
यान्या ले, आख ड़ास सिप ज़्युज़्याव
मिँ ज़,” है ओरादोक ते, १९उसिसर
यायुँ माचाव दाद, “डा ते माताखेहो
सा,” है लिद पालास पालास है
दोकेर। २०हाःत ज़ येसुए, “बाह जना
भरिनी जोए ड़ास भरेस चिपल छोइद
ज़्युज़्याव, हो ज़। २१डा मिँ मिन्सिउए
ते धर्मसास्त्रलाव सर्सिउ मिताव
दुखर जुनी ब सयोव ज़ परिए, खाली
ड़ालाई धोका याज़्याव मिँलाई ते थैए
माँतकन ज़ लिज़्या। निताव मिँ बुरू
ओमाजर्मिकिन तान्या ओल्यो,” है
यादोक्यो।

२२नकिन नो याज़्युज़्यावत ज़ येसुए
उकुइत भरेस तोबो रैद, असिक
निद नो भरेसलाई केःद, “हाँ, आव
ज़्युचिके। आव ड़ाक्याँ ज़,” है दाद
भाःद याएक्यो। २३हो मिताव ज़
फरी खुरी उकुइत रैद धन्याबाद

चरैःद नोरालाई याएक्यो। प्राइँए ननी याओवत, २४येसुए, “आव जेओज्याव कुधु मिँराए जूनी डासोभोरिज्याव डाभी ज़। आनी ज़ परमेस्वरए जेस साःरो बाचा नैदयाचिरिज्याव। २५डा साचो ज़ है डादाचिज्या, परमेस्वरए ओराज्याल साःरोनी डामाओवा पै डा आव भत्यारलाव दाखमदच आछिमकिन ओन्या डामाले,” है यादोक्यो। २६नकिन भजन तोबो गैद ननी पुलुस्द जैतून दाँदादा बाकेर।

पत्रुसए ओयेन येसुए डादा ज़ है ओदोव

(मत्ती २६:३१-३५; लूका २२:३१-३४;
यूहन्ना १३:३६-३८)

२७नकिन येसुए उसिसरालाई, “जे डालाई प्राइँए रास्न्या जेले। धर्म-सास्त्रल इताव सर्सिउ लिज्या,

‘बेधाराए यार्गे गावलालाई

प्रोद डासैःवत,

बेधार चितराँ पुतराँ तारिज्यार।’

२८हैदी ब सिउनी सैसिद जेडादा ज़ गालीलल डाबारिज्या,” है ओरादोक ते, २९पत्रुसए, “प्रभु, उपुर्कावराए प्राइँए यारास्निदी ब डा ते नँलाई डामारास्नी,” है ओदोक ते, ३०येसुए, “डा नँलाई साचो है डादीज्या, आछिम

रील भाल्या नेकराँ ओमाकोद ज़ डालाई स्रोखेप, ‘डामासरेसे,’ है दान्या नले,” है ओदोक ते, ३१पत्रुसए भन ज़, “माःक, डा नँस सिन्या ओतादी ब डा नँलाई डामासरेसे है लिन्या डामाले,” है दोक्यो। उपुर्कावराए मनी हैज़ लिकेर।

येसुए गेतसमनील ओपोँखारिउ

(मत्ती २६:३६-४६; लूका २२:३९-४६)

३२नकिन येसु उसिसरास गेतसमनी यादोज्याव बगैचाल बाद उसिस-रालाई, “डा डापोँखारिवा पै जे आक ज़ लिच्यो,” है दाद, ३३पत्रुस, याकूब सोनो यूहन्नारालाई ओलस यालाँक्यो। हाःत ज़ येसु उयुँर स्यासे सतेद धो थाइव तानाद, ३४नो सोम्लोरालाई, “डायुँर स्यासे तेद सिवा सिवा ताद डाले। जे आक ज़ लिद सैसिद लिचिके,” है दाद, ३५नोराकिन छ्यावा होकसै बाद नामक फुलुप्सिद ओक्याँत हुरिज्याव दुखर भर्सकी ताहुक लिद, ३६“अब्बा, बाबु, नँ नमादोधुव काता ज़ माले, आव डाक्याँत हुरिज्याव धो सहिउ दुखर वैदच्यौके। खाली डा डायुँ ते माःक, नँ नयुँ ओताकिन वाज़,” है लिद पोँखारिद, ३७नो सोम्लोराए

ल्योक उहुवत नोर इल्द यालिज़्याव दैहुद पत्रुसलाई, “सिमोन, नँ इल्द नलिज़्याव रो? नँ कै जैद डास तघन्ता पै ब नमालिधुज़्याव? ३८जे प्राइँ ज़ सैसिद पोंखारिचिके, मानी दुखराल जेमाथरिधुया। जेयुँ ते दान्या ज़ पैज़्याव, खाली पाखाताव जेक्याँ ते मासहिधुन्या ओछ्यास लिज़्या,” है यादोक्यो।

३९नकिन येसु फरी ब डादाडाव ओपोंखारिज़्याव पोक बाद हो मिताव ज़ पोंखारिद, ४०नो स्मोलोराए ल्योक उहुक फरी ब इल्द यालिज़्याव ज़ यादैहुक्यो। नोराए यामीर बनै पातिद यामासहिधुवए यालाजए येसुस काता ज़ मापाँधुकेर।

४१फरी तखेप छींनी ब नोरालाई इल्द यालिज़्याव ज़ दैहुद, “आ:पै जेमीर मायो:ताए रो? ताया, अब बेला यो:के। डा मिँ मिन्सिउ पापीराए कुइत डासूँपिसिरिके। ४२च्याँ:सिचिके, गेबा। डालाई धोका याज़्याव मिँ नक ज़ हुद ले,” है यादोक्यो।

येसुलाई याक्यो:हुव

(मत्ती २६:४७-५६; लूका २२:४७-५३;

यूहन्ना १८:३-११)

४३येसु ओपाँज़्याक ज़ नो बाह जना उसिसरानिकाव यहूदा इस्करियोत बनै माहोल्या मिँरास तरवालीर

खोंतार रैद हुकेर। नोर मुख्या पुजारीर, सास्त्रीर स्मोनो यहूदीराए यासेरराए ल्योनी हुद यालिज़्याव। ४४नो इस्करियोतए डादा ज़ नो क्यो:ना हुज़्यावरालाई, “डा जोलाई माइँ डादोए, होलाई ज़ क्यो:द लाँच्यो,” लिद सरेस याद ओरानैज़्याव। ४५है जैद बगैचाल याकेसो प्राइँना इस्करियोत येसुए ल्योक बाद, “जेरो गुर्बा,” लिद माइँ दोक्यो। ४६हा:त ज़ नो माहोल्याराए येसुलाई ताप तप क्यो:केर। ४७नकाव च्याँ:सिद लिज़्याव तोबोए ओतरवाली हाइद प्रधान पुजारीए ओनोकोरलाई तँनिकाव ओर्ना पल्द सतेदिक्यो।

४८नकिन येसुए नो क्यो:ना हुव माहोल्यारालाई, “काराव डालाई दाँकालाई मिताव तरवालीर खोंतार दाद जेक्यो:हुनाव? ४९जेलाई दिन-काव ज़ ध्यान फ़िमल परमेस्वरए ओपाँ डासथैचिक जेमाक्यो:नाके। खाली धर्मसास्त्रलाव सर्सिउ पाँ सयो:व ज़ परिके,” है ओरादोव प्राइँना, ५०उसिस भरी येसुलाई रास्द चितराँ पुतराँ धों:केर। ५१हो बेलाक तोबो धापाज़ाकाव छोज्या नाडग्या ओक्याँत पालो क्वा वाज़ भिरिसिउ उलिज़्याव। होलाई मनी याक्यो:व प्राइँना, ५२ओक्वार ख्यानैद नाडग्या ज़ धों:के।

येसुलाई घ्योःव कचरील यालाँव

(मत्ती २६:५७-६८; लूका २२:५४, ६३-७१;

यूहन्ना १८:१२-१४, १६-२४)

५३ नकिन नो क्योःना हुवराए येसुलाई प्रधान पुजारीए ल्योक लाँकेर। नक मुख्या पुजारीए, यहूदीराए यास्रेरर सोनो सास्त्रीर दुप्सिद यालिज़्याव। ५४ हो बेलाक पत्रुस जाँ तादाड याछीं याछीं हुद नो प्रधान पुजारीए ओचतराक ज़ हुद नलाव पाल्यारास चुसिद मेंः उमुडँसिज़्याव।

५५ नो फ़िमल मुख्या पुजारीर सोनो घ्योःव कचरीलाव स्रेर भरिए सैःन्या कर याखिमज़्याव, कर ते कान्त ज़ मादैकेर। ५६ धुत गोहाई पाँन्यार कुधु ज़ यातावए सु सु यापाँ ब माखैके। ५७ बल्ल तोबो नेब्लो च्याँःसिद अन्नाकलाव पाँर पलेःद अइ लिकेर, ५८ “आवए, ‘डा आव कुइए जैसिउ ध्यान फ़िमलाई तैःद फरी सोलात कुइए माजैसिउ ध्यान फ़िम डाजैरिज़्या,’ है ओल्यो गे ज़ गेथैके,” है यादोक ब, ५९ नोराए यापाँ ब माखैके।

६० हाःत ज़ नो प्रधान पुजारी याखाल च्याँःसिद येसुलाई, “नँ नपाँ काता ज़ ओमालिज़्याव रो? आवराए नडैत

भाःद याईव पाँ किताव उलिज़्याव?” है ओदोक ते, ६१ येसुए घाइ ज़ मादोक्यो। फरी नो प्रधान पुजारीए, “नँ माहान परमेस्वरए ओज़ा खीस सैं माःक?” है ओदोक ते, ६२ येसुए, “डा साचो हो ज़। तछा डा मिँ मिन्सिउलाई माहान परमेस्वरए ओवोर्दा चुसिद डालिज़्याव ब रँःन्या जेले, सोनो स्वर्गतिन बादलरास डाहुज़्याव ब रँःन्या जेले,” है ओदोक ते, ६३ प्रधान पुजारीए उरिसए ओक्वार चीए चीए, “छुत गोहाई काता ओचाहिउ? ६४ जे ज़ जेथैके, आवए परमेस्वरए उमिन ओबलेःज़्याव। जे कै जेलिज़्या?” है ओरादोक ते, प्राडँ ज़ सैःन्या थःरैद, ६५ ख्वाराए येसुलाई तिल्द, उमीर कपदद्याद मुत्काए प्रोकेर। नै जैज़्यावराए फरी, “नँलाई प्रोज़्याव सु,” है लिद बरेःकेर। सिपाईःराए पाला येसुलाई प्रोए प्रोए लाँकेर।

पत्रुसए येसुलाई ‘डामासरेसे’ है ओरादोव

(मत्ती २६:६६-७५; लूका २२:५६-६२;

यूहन्ना १८:१५-१८, २५-२७)

६६ पत्रुस मेल चतराक ज़ उलिज़्याव। नो बेलाक प्रधान पुजारीए ओय्रेन दाज़्याव तोबो मेंमा हुद, ६७ पत्रुसलाई

में: उमुइंसिज़्याव रँ:द, नोलाई लँ लँ चिऊद, “नँ मनी नासरतलाव येसुस नल्यो सानी,” है ओदोक ते, ६८ पत्रुस माभै:द, “नँ काता नपाँज़्याव इताव, डा ते काता ज़ डामासैए,” है दाद ननी पुलुस्द साँबिलाक बाके। हो प्राइँना ज़ भाल्या कोके। ६९ नकिन जाँ छ्यावाक नो मेंमाए फरी पत्रुसलाई रँ:द नक लिज़्यावरलाई, “आव ते साचो होसकाव ज़ ओल्यो,” है ओरादोक ते, ७० पत्रुस फरी ब माभै:के। फरी छ्यावाक नक लिज़्यावराए, “नँ ब साचो उसिसरासकाव ज़, नँ ते गालीललाव ज़ ची,” है यादोक ते, ७१ पत्रुस बनै थलिसद किज्या भा:द, “नो है जेलिज़्याव मिँलाई सरेस ज़ डामासरेसे,” है ओरादोव प्राइँना ज़, ७२ भाल्या नेकराँ कोके। ना:त ज़ डादा येसुए पत्रुसलाई, “भाल्या नेकराँ ओमाकोद ज़ स्रोखेप डालाई, ‘डामासरेसे’ है लिन्या नले,” है ओदोव पाँ ब चेतैक्यो। नो चेतैद पत्रुस बनै घर्के।

रोमी सरकारलाव पिलातस

(मत्ती २७:१-२, ११-१४; लूका २३:१-५;
यूहन्ना १८:२८-३८)

१५ छकाल्न्या घग ज़ मुख्या पुजारीर, यहूदीराए यासेरर, सास्त्रीर सोनो घ्यो:व कचरीलाव

भरी यासल्ला खैद येसुलाई किद पिलातसए ल्योक लाँद सूँपिकेर। २ है जैद पिलातसए येसुलाई, “नँ साचो यहूदीराए याराजा ज़ रो?” है ओदोक ते, येसुए, “नँ ज़ नथ:रैनाके सानी,” है दोक्यो। ३ ना:त ज़ मुख्या पुजारीराए येसुलाई कुधु ज़ खतर लैकेर। ४ पिलातसए, “काराव घाइ नमालि-ज्याव? ना: कुधु पाँर नडैत भा:द याईज़्याव नमाथैए रो?” है ओदोक ब, ५ येसु भन ज़ तोबो ब मापाँके। निताव रँ:द पिलातस अचम्ब ताके।

येसुलाई रासो यामाभै:व

(मत्ती २७:१५-२६; लूका २३:१३-२५;
यूहन्ना १८:३९-१९:१६)

६ पिलातसए ओपालाक सालकाव तखेप निस्तार पबंत यहूदीराए जो कैदीलाई ‘रास्दचासिके’ है लिज़्यार, होलाई ज़ रास्द ओराएज़्याव। ७ हो बेलाक तोबो बारब्बा यादोज़्याव ओनैरास भयालखानाल यालिज़्याव। नोर सरकारकिन तँदा जैसिद मिँरालाई मचैद तोबो नेब्लोलाई सै:द यारानैज़्याव। ८ है जैद माहोल्याराए पिलातसए ल्योक बाद, “सालकाव तखेप तोबो कैदीलाई रास्द नयासि-ज्याव मिताव आथ पाला ब तोबोलाई रास्दचाव ताके,” है यादोक ते, ९ पिलातसए, “हुकी यहूदीराए

याराजालाई रास्द डाय्याच्यो रो?" है यादोक्क्यो। १०ओल पिलातसए ते 'आवराए येसुलाई अनाकल ज़ यामी तूद सूँपिद नैनार' लिन्या सैँद ओनैज़्याव। ११मुख्या पुजारीराए भन मिँरालाई मचैद, "माःक, नो बारब्बालाई रास्दचासिके," है दाव यारापरीकेर। १२नो पाँ थैद पिलातसए फरी, "हुकी नो यहूदीराए याराजा जेदोज़्यावलाई डा कै जैन्या की?" है ओरादोक ते, १३नोर, "क्रुसत तङ्गैद सैःन्या," है लिद क्रिकेरे। १४पिलातसए फरी, "काराव? आवए मादान्या काता दाद ओनैज़्याव?" है ओरादोक ते, नोर भन ज़ मचिद, "क्रुसत तङ्गैद सैःन्या," है लिद बनै ज़ क्रिकेरे। १५है जैद पिलातसए माहोल्यारालाई सभैःन्याए जूँनी बारब्बालाई रास्दचाद येसुलाई रीःद, क्रुसत तङ्गैद सैःन्याए जूँनी सिपाईरालाई ज़ यासूँपिक्यो।

येसुलाई यागिल्लैव

(मती २७:२७-३१; यूहन्ना १९:२-३)

१६हाःत ज़ सिपाईराए येसुलाई प्रेतोरियन यादोज़्याव दरबार जील लाँद रोमी पलतन भरी यारादुप्केर। १७नोराए येसुलाई घ्यामज्यासो क्वा जास्द, जुए मुकुत रूँद ओडैत जास्द,

१८"ए यहूदीराए याराजा, जय जय ओताक," है लिद बरेःद, १९ओडैत भाताए प्रोदचाद, तिल्द, ओड़ाक याघूँदानी फुलुप्सिद धो दाद ओमान नैदचाव मिताव जैसिकेरे। २०गिल्लैद गिल्लैद चिम यादोवत नो घ्यामज्यासो क्वा सिउःदचाद, ड़ादाडाव ओक्वार जास्द क्रुसत तङ्गैना लाँकेर।

येसुलाई क्रुसत यातङ्गैव

(मती २७:३२-४४; लूका २३:२६-४३;

यूहन्ना १९:१७-२७)

२१यालाँज्याक तोबो नाखारनी हुज़्याव कुरेनीलाव सिमोनलाई येसुए ओलाँज्याव क्रुस सुघुर्केर। नो मिँ अलेक्जेन्दर स्नोनो रूफसनी निबाबु ओल्यो। २२येसुलाई गलगथा यादोज़्यावक सकेस्केर। नो पोए उमिन 'खप्पज्या पो' है ब यादोज़्याव। २३नक येसुलाई वासः भाःसिउ दाखमदच यासवैक ते येसुए ओव माभैःके। २४हाःत ज़ येसुलाई क्रुसत तङ्गैकेर। यातङ्गैवत ओक्वारात गोला भाःद भाःकेर।

२५क्रुसत यातङ्गैव बेलाक नौ बजिद उलिज़्याव। २६ओललाई तङ्गैद यानैःज्याव क्रुसए ओडैत, "आव यहूदीराए याराजा ज़" है लिद तोबो फल्यात



ओखत सर्द चकेर। २७नो छचाम नेब्लो चोरनिलाई मनी तोबोलाई ओवोर्दा तोबोलाई ओदाबज्यादा जैद क्रुसत तङ्गैद यारानैज्याव। २८[है जैद धर्मसास्त्रलाव सर्सिउ पाँ ब नत ज़ यो-के। नलाव सर्सिउ आव ज़, “नो अपराधीरास गनिसिरिज्या।”] २९आनी हुनी भाल्सिना हुवराए याडैर डत डत जैद थल्द, “हाइ! हाइ! नँ ‘ध्यान फ़िमलाई तैःद स्रोलात डाजैरिज्या’ है लिज्याव मिँ, ३०नँ क्रुसतिन भरिद हुद नक्याँलाई बाँचैके,” है दोकेर। ३१हिताव ज़ मुख्या पुजारीर स्रोनो सास्त्रीराए या याल येसुलाई गिल्लैद, “आवए छुतरालाई ताकितर याबाँचै-ज्याव, ओल ओक्याँलाई कै जैद ओमाबाँचैधुज्याव? ३२इस्राएलीराए याराजा ख्रीस जैसिज्याव नो क्रुसतिन भरिद उहुकदा, गे नो रँःद ओपाँ पतिन्या गेले,” है लिकेर। ओलस तङ्गैसिउ चोरनी मनी हैज़ लिकिनी।

येसु उसिउ

(मत्ती २७:४५-५६; लूका २३:४४-४६;

यूहन्ना १९:२८-३०)

३३नकिन बाह बजेकिन तीन बजे पै देस भरी काल्या कले भयाके।

३४तीन बजेवाक येसु बनै चोइस, “इलोई, इलोई, लामा सबखथनी?” है लिद किके। नोए ओसै, “अ डापरमेस्वर, अ डापरमेस्वर, डालाई काराव नरास्नाव?” ३५नक च्याँःसिद लिज्यावराए नो पाँ थैद ख्वाराए, “थैचिसाँ, आवए ते एलियालाई ची उखुल्ज्याव सा,” है लिद, ३६तोबोए धोंःनाद भाताए उतुपात थाकना पोःद सिरो दाखमदचल छिम्द येसुए ओयाःत भाःदचाद पिउ परींद, “अब ते चिऊद गेनेया, एलिया कातारानी हुद माहाइज्याव?” है लिके। ३७नाःत ज़ येसु बनै चोइस किद उस० सफ्याःक्यो।

३८हो प्राइँना ज़ ध्यान फ़िमलाव बारिसिउ क्वा ब उतुपानी ओजराड पै ओलनी ज़ नेपरा ताद चिस्के। ३९येसुए ओड़ाक च्याँःसिद लिज्याव कप्तानए निताव उस० ओफ्याःव रँःद, “आव ते साचो ज़ परमेस्वरए ओजा ची ओल्यो,” है लिके। ४०हो बेलाक ख्वा मेंमाराए ब जाँ तादानी येसुलाई चिऊद यानैज्याव। नोरानी मरियम मग्दलिनी, जिम्ज़ा याकूब स्रोनो योसीनी निआमा मरियम, स्रोनो नोनिस सलोमी ब ओल्यो। ४१येसु गालीलल उलिज्याव



बेलाक नोर ओलस ओलस बारिद ओसेवा यादोज्याव। यरूसलेम पै ओलस हुव छुत मेंमार ब कुधु ज़ याल्यो।

येसुए ओमोरो खादर पुपल याभाःव

(मत्ती २७:५७-६१; लूका २३:५०-५६;

यूहन्ना १६:३८-४२)

४२ न्नासिन्या छचामए ओङ्गालाव तयारीलाव दिन ओल्यो। हो छचाम ज्याम्या रिमी ओभयानाक, ४३ तोबो अरिमाथियालाव योसेफए घ्योःव युँस पिलातसए ल्योक बाद येसुए ओमोरो न्निक्वो। नो घ्योःव कचरीलाव घेप्पा मिँ ओल्यो। ओल मनी परमेस्वरए ओराज्यालाव येम ख्विम्ज्याव मिँ ज़ ओल्यो। ४४ पिलातसए येसु ङादा ज़ उसिधुव पाँ थैद अचम्ब ताद कप्तानलाई ओल्योक खुल्द, “येसु साचो उसिधुव रो?” है लिद सुधिक्यो। ४५ है जैद नोए ओल्योनी येसु सिके लिन्या ओथैवत ओमोरो योसेफलाई लाँव एक्यो। ४६ योसेफए फरी पालो क्वा लँःद येसुए ओमोरो-लाई क्रुसतिन हाइद, नो क्वाए लुम्बैद दावन खुपिद पुप जैद ओनैज्याव खादरल भाःद ओयामक घ्योःव लुँए कक्वो। ४७ मरियम मगदलिनी स्नो नो योसीए ओआमा मरियमनी नो ओभाःज्याव पो चिऊद निनैज्याव।

येसु सिउनी सैसिद ओसोव

(मत्ती २८:१-८; लूका २४:१-१२;

यूहन्ना २०:१-१०)

१६ न्नासिन्या छचाम ओखेमोत मरियम मगदलिनी, याकूबए ओआमा मरियम, नोनी निनैँ सलोमी-रास येसुए ओमोरोलाई थीदचान्याए जूँनी चाव सी डरो मासर अतरर लँःद, २ सातालाव उसंक्ताव छचाम घग ज़ घाम पलेक नोर खादर पोदा याबाज्याक, ३ नोराए, “गेलाई नो कसिउ लुँ सुए पल्लैदचासिउके?” है लिद, ४ खादरदा याभाल्सिक ते नो बनैँ घ्योःव लुँ पल्लैसिउ उलिज्याव रँःकेर। ५ नोर फरी खादर पुपल पसिद नल उजीँल तोबो पालो क्वा क्वाइसिउ धापाज़ाकाव मिँ खादरए ओवोर तंदा चुसिद उलिज्याव रँःद बनैँ ज़ अचम्ब ताद यालिज्याक ते, ६ नोए, “अचम्ब ताताच्यो, नो जेख्विम्ज्याव क्रुसत यासैःव नासरतलाव येसु आल माले, सैसिद सोधुके। अछादी आव यानैव पो चिऊचिकेदा, ७ जे पत्रुस स्नो नो उपुर्काव उसिसराए ल्योदा बाद, ‘येसु जेङ्गादा ज़ गालीलदा बाज्या दी। ओल है उलिज्याव मिताव, होड ज़ ओलस दैसिन्या जेले,’ है यारादोनाचिके,” है ओरादोव प्राइँना, ८ नोर ननी धोंःद

याछ्याचेए बनै भुम भुम गूद सुलाई
ज़ नो पाँ है मारादोधुकेर।

येसु ओसैःसिउ

(मत्ती २८:६-२०; लूका २४:१३-४६;

यूहन्ना २०:११-२३; ओसाचीर १:६-८)

६[सातालाव उसंकताव छ्याम
छकाल्‌न्या घग ज़ येसु सिउनी सैसिद
ओसोवत प्राइरानी डादा मरियम
मगदलिनीए ओल्योक सरैःसिके।
नो मेंमाए ओक्याँतिन येसुए डादा
सात गोता माचाव पुरूसर पलेद
ओरानैज़्याव। १०है जैद नोए उसिसराए
ल्योक बाद उरैःव भरी है यादोक्यो।
नो बेलाक नोर यायुँ बनै माचाव दाद
घरो ज़ यालिज़्याव। ११खाली नोराए,
'येसु सैसिके, डा ज़ रँःद डानै,' है
ओल्यो पाँ याथैज़्यावत ब मापतिकेर।

१२फरी छीनी येसुए उसिसनी
नाखारदा निबाज़्याक येमत येसु छुत
सुरूप जैसिद निडाक सरैःसिके।
१३नोनी ओल्द बाद उपुर्कावरालाई है
निरादोक ते, नोनी निपाँ ब मापतिकेर।

१४नकिन छीनी एघार जना उसिसर
काँ याज़्युज़्याक येसु नोराए याडाक
ब सरैःसिके। नोराए खाव यायुँ जूनी
येसु सिउनी ओसैसिउत ओललाई
रँःज़्यावराए यापाँत यायुँ ओमाहुबोए

येसुए नोरालाई यासिडाक्यो। १५सोनो,
“जे आव संसार भरिल प्राइँदा ज़ बाद
चाव था प्राइँलाई ज़ यारासथैनाच्यो।
१६जोए उयुँ हुपद परमेस्वरए
उमिनत सछैसिज़्या, हो बाँचिन्या
ले। फरी जोए उयुँ माहुबे, होए
परमेस्वरए ओसजा दैन्या ले। १७यायुँ
हुपुज़्यावराए याक्याँत इताव सरेसर ब
तान्या लेर — डा डामिननी माचाव
पुरूसर ब पलेन्या लेर, साःरो साःरो
खामनी ब पाँन्या लेर, १८घुलरालाई
याराक्योःदी ब, तुन्यार याज़्युदी ब
कैज़ तान्या मालेर। याजोरो हुवराए
याक्याँत याकुइ नैद याराएक नोर
गराँन्या लेर।”

येसु स्वर्गत ओबाव

(लूका २४:५०-५३; ओसाचीर १:६-११)

१६है जैद प्रभु येसुए ओपाँ भरी है
ओरादोवत याडाकिन ज़ स्वर्गदा
छींसिद परमेस्वरए ओवोर्दा
चुसिनाके। २०उसिसर ते ननी बाद
परमेस्वरए ओपाँ प्राइँदा ज़ यारा-
सथैनाकेर। प्रभु यास यास ज़ लिद
नो यारासथैज़्याव पाँत अचम्बलाव
सरेसर जैदचाद नो यापाँ थैज़्याव
भरिरालाई साचो ज़ थरैद याएक्यो।
आमेन।]